


ANG YAWI SA PULTAHAN

 Usa gayud ka pribilihiyo ang makatambong sa tabernakulo! Wala nako kini damha, usab. Ako, nasayod nga karong gabhiona mao ang gabii sa komunyon, gusto nako, nga kanunay kong makatambong sa komunyon, kung anaa lang ko sa palibot dinhi. Tungod kay kini. . . Sa tan-aw ko kinahanglan nga ang tanang mga Cristohanon magaanbit gayud sa komunyon, tungod kay miingon si Jesus, “Kung dili kamo mokaon niini, wala kamo’y bahin Kanako.” Busa, kini usa ka . . . kanunay nga usa ka daku nga pribilihiyo nga—nga makaanhi dinhi sa tabernakulo. Unya, karong gabhiona, nasulti ni Igsoong Neville nga medyo pagaw kono siya, ug—ug mihangyo nga kung puede ako ang mamulong sa atong kongregasyon. Giingnan nako siya nga ikalipay nako kana. Gusto pud nakong ipahibalo nga kung. . .

² Ugma sa gabii mao ang panagtigum sa mga kalalakin-an, sa mga tinugyanan, ugma sa gabii, ug sa mga negosyante dinhi sa simbahan, para sa ilang regular nga panagtigum sa Lunes sa gabii ug sa ilang. . . aduna sila’y pagahimoon nga desisyon uban sa kontraktor. Siguro nasabtan na sa tanan nga ang atong—atong—atong mga papeles nahan-ay na, ug puede na kitang magpatukod og simbahan. Ug busa nahuman na kini, ug tingali sugdan na karong semanaha. Magsugod na ang pagpatukod sa simbahan karong semanaha, sumala sa nasayran ko. Ug gibalibaran ta, dinhi sa Jeffersonville. Apan miadto ta sa Indianapolis, sa estado mismo, ug gihatagan ta nila og permiso, mao nga mapatukod na nato kini. Ug busa magsugod kini, tingali, karong semanaha. Pero mahibaw-an pa kini human sa miting ugma sa gabii. Ug pagkahuman sa panagtigum ugma sa gabii, kung dili sila magsugod karong semanaha, kung adunay mahitabo, nga ang kontraktor dili pa makasugod karong semanaha, mahimong iyang pagasugdan sa sunod na nga semana.

³ Ug karong moabotay nga katapusan sa semana, sa Sabado sa gabii, sa Domingo sa buntag ug Domingo sa gabii, sa sunod semana, karong moabotay nga Sabado ug Domingo, kon itugot sa Ginoo, gusto ko nga magkaaduna og usa—usa—usa ka tinulo nga panagtigum, pag-usab, sama sa atong gibuhay niadtong pipila ka semana na ang milabay. Ug dayon pagkahuman nato. . . Sa Sabado sa gabii kana, sundan sa Domingo sa buntag ug Domingo sa gabii. Sunod niini, sa ika-trese kana ug sa ika-katorse niining bulana.

⁴ Ug dayon ang pipila sa mga kaigsoonan ug ako molakaw pagkahuman niana nga higayon, padulong sa Colorado, sa usa ka biyahe sa pagpangayam, dayon mabalik ra pud nganhi. Kung

ang tabernakulo, pagmahuman na kini, kung kabubut-on man kini sa Ginoo, buot nakong mogahin, tingali'g, usa ka tibuok semana para hisgotan *Ang Pito Ka Selyo* sa Pinadayag, sa dili pa ko moadto pag-usab sa mga panagtigum. Sama niadtong. . . Sama sa atong paghisgot niadtong *Ang Pito Ka Kapanahonan Sa Iglesia*, karon *Ang Pito Ka Selyo* na pud ang sunod Niana.

⁵ Ug tingali sa mga sunod nga duha o tulo ka semana, tungod kay sa tan-aw ko sumala sa ingon nila, basi sa mga trabahante nga ilang patrabahoon didto, makaya nilang, mahimo natong tukoron ang tabernakulo ug maandam na kini sulod sa mga napulo ka adlaw, o kinse, mga ingon niana. Dayon magkaaduna na ta og malingkoran dinhi nga doble ang mapaigo, o katulohon ang gidaghanon sa mga nanambong, tingali mas daghan pa gani. Ug ingon-ana ang akong ginadahum inig human niana.

⁶ Tungod kay, niadtong miaging Sabado ug Dominggo, grabe kaayo, kabalo na mo. Anaa na dinha sa gawas ang mga tawo, mga alas dos pa lang sa hapon, aron iokupar ang tabernakulo, bisan wala pa giablihan ang simbahan. Pagkasunod buntag, mga alas singko pa lang, usa ka nars nga silingan nako, nga gikan didto, miingon, “Aduna na baya og mga tawo nga nagdasok palibot didto sa tabernakulo mga alas singko pa lang gani sa buntag.” Mao nga, ug dayon ang maong mga tawo, pagsulod nila, wala na man diay og lugar, nawad-an sila og kadasig ug mibiya na lang. Ug—ug dayon kadtong mga nagtindog, ug nagtapok sila ug nagdasok na dinha sa agianan, mibati sila'g pamikog, ug tanan na. Ug nakita nako ang mga kababayen-an nga nagtindog dinha, nga mga gipaningot, kabalo mo, ingon niana, ug nagtulo-tulo gyud ilang mga singot. Ug dunay lalaki, nga mitindog na lang ug mihatag sa iyang lingkوران sa usa ka babaye; ug dayon nagtindog na lang siya hangtud nanghawoy ang iyang mga bitiis, ug aduna na puy laing mohatag og lingkوران sa iya. Kabalo mo, ug ingon niana, ug makaluluoy gayud, ug labi na ang mga inahan nga adunay gagmay'ng mga masakiton nga bata ug uban pa, makasubo gyud kana.

⁷ Busa, gipanguha namo nga sulbaron kana karon pinaagi sa pagtukod og mas daku nga tabernakulo. Ug magkaaduna na kita og nindot nga luna diin ang mga bata, nga usahay. . . ug makadisturbo, sama sa gagmay'ng mga bata nga nahahilak; bueno, magkaaduna na kita'y usa ka lawak para niana, aron makasulod gihapon ang mga inahan, ug makatambong sa buluhaton, ug makadungog gihapon dinha sa maong lawak. Ug aduna pud og mga lawak pang-Sunday school ug ang tanan nakahan-ay na sa kung unsa ang angay. Ug kana, kung itugot sa Ginoo, pagasugdan na, niining moabotay nga semana.

⁸ Siyento porsyento ninyo kining gibotohan, maong gituman namo kana, kita n'yo. Adunay soberanya ang iglesia. Kung unsa ang pagadesisyonan sa iglesia, mao na gyud kana. Walay tinugyanan o si kinsa man. . . Ang mga tinugyanan, ang matag

usa kanila, adunay usa lamang ka boto. Usa lang pud ka boto ang sa pastor. Ang iglesia gyud, mao kana—kana ang demokrasya sa simbahan, ang soberanya sa iglesia. Ang iglesia kini, sa kinatibuk-an, nga nagasulti. Ingon niana kana. Ug gusto nato kana, tungod kay wala ta'y mga obispo o mga herarkiya o mas labaw nga tigdumala o uban pa aron isulti kanato *kini, kana*, o ang *uban pa*. Ang Balaang Espiritu sa iglesia, ang mao mismong nagapamulong. Ganahan ko niana nga pagdumala, ug kini maayo kaayo.

⁹ Ug nangutana ko, “Mouyon ba kamong tanan nga maghulat hangtud nga magkaaduna ta'y igong pundo nga ibalhin ang tabernakulo ug magtukod og daku nga simbahan?” Gipresentar kini ngadto sa hunta sa tinugyanan, apan dili kini madesisyonan sa mga tinugyanan. Ug dayon gihangyo ko nila, ingon nga pangkinatibuk-ang tigdumala, nga ipresentar ug pangutan-on ang iglesia. Busa miingon ko, “Sa pagkakaran aduna na kita'y igong salapi aron madugangan ang gidak-on sa simbahan ug bag-ohon kini, ug tanan na, gikan sa kung unsa ang naa kanato.” Miingon ko, “Karon mahimo nato kana sa gilayon, o tigumon usa nato ang atong salapi hangtud nga makatigum kita'g igo aron kumpleto ang pagkatukod sa simbahan, nga bag-o gyud, diha sa lahi na nga lokasyon.”

¹⁰ Ug nagpahigayon kita og pagboto sa simbahan bahin niini, ug nagkahiusa ang tanan sa pagboto nga “magtukod og simbahan sa gilayon, ug kini mao ang pagtukod og mas daku ra nga simbahan sa gilayon.” Ug nagpabilin kita niana.

¹¹ Ug wala ta tugoti sa konseho dinhi sa Jeffersonville, miingon nga dili daw nato puedeng ipahigayon kini. Ug wala kadto nakapapugong kanamo, ug miadto mi sa Indianapolis ug gipa-aprobanan kini sa maong Estado. Ug dayon miingon sila, nga, “aprobado,” aduna na kita'y katungod para mapatukod na gyud kini. Busa kung ingon-ana wala na'y kalambigitan ang siyudad niini karon, kay ang Estado na ang nag-aprobar niini. Busa aduna na kita'y permiso, ug ang kontraktor aduna—aduna na'y gikuptan nga permiso karon, ug nagtoo ko nga andam na silang magsugod bisan unsang orasa.

¹² Ugma sa gabii, kung ang—kung ang kontraktor moingon nga gusto na niyang magsugod dayon sunod semana, nan hunongon lang usa nako ang mga panagtigum. . . hangtud nga makaabot ta sa *Ang Pito Ka Selyo*. Ug unya kung ang kontraktor dili pa makasugod sunod semana, nan sa sunod Dominggo, Sabado ug Dominggo, mopahigayon ko'g panagtigum sa dili pa ko mobiya.

¹³ Ug iwali unta nako kini niining Dominggoha, ug pagkahibalo ko nga komunyon man diay karong gabhiona, maong gikansela usa nako kini niining Dominggoha. Tungod kay, sa ingon ka daghan nga mga tawo, dili gyud komportable

nga mapahigayon ang komunyon, pero pag-aduna na kita'y mas daku nga simbahan mahimo na gyud nato kini.

¹⁴ Karon, aduna na kita'y bag-ong Presidente. Ang...oh, kabalo na mo kung unsay akong pasabot, bag-o pang gihimugso kini sa pamilyang Hickerson. Ug ang atong igsoong babaye nga piyanista, kung mahimo nga moanhi siya ug hatagan ta og gamay'ng tono sa piyano, sa "Bring Them In," kung mahimo nimo, o ubang mubong alawiton nga sama niana. Kining buotang gamay'ng lalaki sa pamilyang Hickerson, nga dugay nang gihulat, miabot na gyud. Usa ka guwapo og gamay'ng tawo, ug siya usa gayud ka mutya para sa mga Hickerson. Ug silang tanan bilihon gayud para kanato, gihigugma nato sila ug sila tinuod gyud nga atong igsoong lalaki ug igsoong babaye. Gikalipay nato nga natawo kining gamay'ng bata sa ilang pamilya, nga hingpit gyud nakapabag-o sa maong pamilya. Ug sila, nga amahan ug inahan kung mahimo na nilang dalhon kining gamay'ng bata karon alang sa paghalad. Karon, ang Kasulatan nagaingon, "Ilang gidala ngadto Kaniya ang mga bata, mga masuso, aron mapandongan Niya sila sa Iyang kamot ug mapanalanginan sila."

¹⁵ Karon, adunay mga tawo sa kalibutan nga nagatoo sa ilang ginatawag nga "pagbunyang sa masuso." Ug, kana'y, ginadala lamang nila kining gagmay'ng mga bata ug dili gyud tinuod nga gibautismohan sila, tungod kay, ila lang man silang giwisik-wisikan og tubig. Karon, dili nato kana makita bisan asa sa Biblia, kung diin ilang giwisikan kaniadto ang si bisan kinsang, mga hamtong na, unsa pa kaha ang mga bata.

¹⁶ Ug busa ang bautismo usa ka pagpahayag nga aduna na'y nahitabo nga grasyanhong buhat sa sulod. Ug ang gagmay'ng mga masuso wala pa'y himbangaagan mahitungod sa sala. Busa, kaniadtong namatay si Jesus didto sa krus, namatay Siya aron sa pagkuha sa sala sa kalibutan. Ug sa diha ang bata mahimo nang usa ka tawo, ug mahimugso na dinhi sa kalibutan, wala pa sila'y sala sa ilang kaugalingon, busa wala sila'y paghinulsol nga pagabuhaton. Apan, pagmoabot na sila niana, ang Dugo ni Jesus Cristo nagakuha niana nga sala. Siyempre, ang bata natawo sa sala, giporma sa kadautan, mianhi sa kalibutan nga nagasulti og mga bakak, ug mga makasasala sila sa kinaiyahan, apan ang Dugo ni Jesus Cristo ang nagabayad niana. Apan kung ang bata moabot na sa edad sa pagkahamtong, ug nakaila na kung unsa ang husto ug sayup, nan kini kinahanglan nang maghinulsol para sa mga butang nga nabuhat niini. Ang sala sa bata sa pagkaron mao lamang ang sala maingon nga gihimugso kini sa sala, ang sala kini nga anaa na sa tawo, kini nga sala karon mao'y sala nga nabuhat ni Adan ug Eva kaniadto; ug gitangtang kana sa Dios, pinaagi sa Dugo ni Jesus Cristo. Sa pagkaron ang bata wala pa'y sala nga hinulsolan hangtud nga makasala na siya, diin

nianang puntoha kinahanglan na gyud niyang maghinulsol. Kita n'yo? Ug sa dihang maghinulsol na siya, mao na kana ang panahon nga mahimo na siyang bautismohan, ug dayon siya pagabautismohan pinaagi og paglusbog.

¹⁷ Hangtud niana nga panahon, sundon nato ang mga gisugo sa Biblia, nga, “Ilang gidala ngadto kang Jesus ang gagmay'ng mga bata, aron mapandongan Niya sila sa Iyang mga kamot ug mapanalanginan sila.” Ginadala sa niining hiligugmaon nga ginikanan karong gabhiona kining gamay'ng bata ngadto sa pastor ug kanako, alang sa paghalad. Ug gibati nila nga ang pagtugyan nila niini diha sa mga kamot sa mga representante ni Cristo, pareho ra nga ginatugyan nila kini sa mga kamot ni Cristo. Dayon, pinaagi sa pagtoo, atong ginahalad ang bata ngadto sa Dios, aron magpasalamat sa pagpadala niini dinhi, ug hangyoon ang Dios nga panalanginan kini, nga atong gitawag nga “paghalad sa masuso.”

¹⁸ Karon, nasayod gyud mo kung unsa ako sa ako mismong mga anak. Duna ko'y gamay'ng batang babaye nga anaa na sa Himaya karong gabhiona, ug nahalad siya sa Ginoo, dinhi niini nga altar. Aduna ko'y usa ka gamay'ng batang lalaki ug babaye nga nagalingkod dinha sa luyo, karong gabhiona, nga wala pa mabautismohan. Ang usa, onse anyos, gisultihan ko na siya bahin niini, si Sarah, para mabautismohan. Ug si Joseph pito pa lang, maong bata pa kaayo siya para niini, hangtud nga . . . Kung tinguhaon niya kini, ug moingon nga gibutang kini sa Dios sa iyang kasingkasing, nan pagabuhaton ko kana dayon. Apan, alang sa mga masuso, ginahalad ko lang sila ngadto sa Ginoo, tungod kay mao kana ang pagtulon-an sa Kasulatan mahitungod niini.

¹⁹ Igsoong Neville, kung mahimo ubani ako dinhi karon sa niining buotan nga bata. Pasensya na . . . Si Hollin ba? Hollin? Oo, si Hollin, Junior. Stephen Hollin. Bueno, maayo kana. Oh, abi nako'g natulog siya. Kinaiya gyud kana sa mga Hickerson, bisan unsang nagakahitabo. Nakita nako siya niadtong miaging adlaw, miingon ko “ang Presidente,” ug uban pa. Ug, siyempre, bata pa siya kaayo para niana, kita n'yo, ang tawagon siya ingon nga usa ka “Presidente.” Kumusta na ka? Bueno, nahibalo ko nga siguradong usa kini ka bahandi para kang kinsa man nga diosnong inahan. Mouyon ka ba niana? Pagkabuotan gayud. Ug karon, Igsoong lalaki ug Igsoong babayeng Hickerson, ingon nga alagad ni Cristo, ingon nga inyong pastor, akong ginadala kining bataa, pinaagi sa pagtoo, ngadto sa mga bukton ni Jesus Cristo, kang Kinsa gusto ninyong ibutang kini sa Iyang mga bukton.

²⁰ Iduko nato ang atong mga ulo samtang ang pastor ug ako nagabarug dinhi nga nagapandong sa among mga kamot sa bata.

²¹ Among Langitnong Amahan, diha sa Biblia ilang gidala Kanimong gagmay'ng mga bata, aron ipandong Mo kanila ang

Imong mga kamot ug panalanginan sila. Ug sa pagkatinuod, Ginoo, napanalanginan gayud sila. Ug karon sa pagsunod sa Imong sumbanan, sa mga butang nga Imong gibuhat, ginapaninguhaan namo pag-ayo, Ginoo, sa among pagbasa sa Biblia ug pagsunod sa sumbanan sama sa Imong gibuhat. Ug kini nga amahan ug inahan, Igsoong lalaki ug Igsoong babaye nga Hickerson, among minahal nga mga tinun-an dinhi sa tabernakulo, ilang gidala kanamo kining gamay'ng kalipay nga Imong gitugyan sa ilang pag-amuma. Gikan kini Kanimo, Ginoo. Ikaw ang naghatag niini nga bata ngadto kanila. Ug karon buot nilang ihalad ang linghod nga kinabuhi niini nganha Kanimo, aron mahimong usa ka pag-alagad Kanimo. Ako nagaampo nga Imong panalanginan kini nga bata, nga Imong hatagan kini og hataas nga kinabuhi. Hinaut nga mabuhi kini, kon mahimo, nga masaksihan mismo ang Pag-abot sa Ginoo. Nagaampo ako nga Imong panalanginan kini bisan asa man kini. Hinaut nga kini mapadaku sa usa ka Cristohanong panimalay, ingon nga kini nahimugso ngadto niini. Ug hinaut nga magpadayon kini sa niini nga panimalay. Hinaut nga ang amahan ug inahan mabuhi pa para masaksihan kini nga bata nga nagabarug diha sa pulpito, kung mahimo, nga nagawali sa Maayong Balita. Mas gusto pa nila nga makita kini ng mamahimong ingon niana, Amahan, kay sa maanaa sa—sa usa ka trono didto sa White House, o sa kon asa man, tungod kay sila Imo mang mga alagad, ug nagtinguha nga ang kinabuhi sa bata mamahimong usa ka halad ug usa ka panalangin alang sa buluhaton sa Dios.

²² Karon nagaampo ako, Amahan, nga Imong panalanginan kini nga bata. Ug hinaut nga ang grasya sa Dios magaabot niini, ug hinaut nga kini mahimong himsog ug magmalipayon sa tibuok niyang kinabuhi. Ug hinaut ang amahan ug inahan niini mabuhi para makita pa ang pagdaku niini, amo kining ginahangyo pag-usab. Panalangini kini ang among ginapanalanginan sa Imong Ngalan.

²³ Ug karon, gamay'ng Stephen Hollin Hickerson, ginahalad ko ikaw kang Jesus Cristo, aron ang mga panalangin nga among gipangayo moabot kanimo. Magmahimsog ka ug mamahimong lig-on, akong gamay'ng igsoon, ug hinaut nga mabuhi ka aron sa paghimaya sa Dios. Sa Ngalan ni Jesus Cristo among ginapangamuyo kini. Amen.

Panalanginan ka sa Dios. Panalanginan kamong tanan sa Dios. Pagkabuotan gayud nga bata.

Where we'll never grow old, never grow old,
In the Land where we'll never grow old;
Never grow old, never grow old,
In the Land where we'll never grow old.

²⁴ Dili ba pagkaanindot gayud? Ang mga batan-on mamahimong hamtong, ug ang tigulang mamahimong batan-

on. Karon, dili ba pagkamaanindot niana? Ug dili na gyud kita magmasakiton pa, o wala na gayu'y kagul-anan, o dili na gyud mamatay.

²⁵ Karon, ang mga panerbisyo, napahibalo na ni Igsoong Neville. Gusto ko karon ipahibalo, usab, nga kana nga panagtigum, ayaw kini kalimti, ug kadtong mga panagtigum nga iyang giingon. Dugang pa, si Mrs. Ford nga nagatambong dinhi sa simbahan sa milabay'ng mga katuigan, bag-o lang nako siya gidala sa iyang anak nga babaye, mga duha na ka adlaw ang milabay, ug siya'y otsenta anyos na, ug mitaliwan na siya aron makigkita sa atong Ginoo kagabii sa mga alas otso, sa tan-aw ko. Ug ang mga panerbisyo para sa iya, ang pastor ug ako magpahigayon ug panerbisyo sa kapilya didto sa Coots' Miyerkules, sa alas diyos—diyos-traynta, sa niining moabot nga Miyerkules. Mrs. Ford, Mrs. . . . Nakalimot ko sa iyahang. . . Levi, Mrs. Levi Ford. Ang atong. . . Kana'y—kana'y inahan ni Lloyd Ford nga makita n'yo sa akong libro, nga gitipigan niya kadtong sanina nga pang-Boy Scout para sa ako, ug usa na lang ka legging ang nahabilin nako. Karon, kana'y—kana ang inahan niadtong lalaki. Busa gikuha nako siya niadtong miaging adlaw ug nag-ampo ko uban niya, ang luoy'ng igsoon. Ug siya'y mitaliwan na para makigkita sa atong Ginoong Jesus.

²⁶ Karon, kon itugot sa Ginoo, aduna ko'y usa ka butang dinhi nga mahimo nakong ipahibalo nga ang mga panerbisyo, kung maipahigayon ang mga niini karong sunod nga semana, kung nabutang ko man ang mga niini dinhi, o nadumduman ko man lang nga nasuksok nako, mahitungod sa kung unsay akong igapamulong para sa—sa—sa moabotay, niining moabotay nga panerbisyo sa sunod nga semana. Kung ako—sa tan-aw ko. . . Sa hunahuna ko gibutang nako kini dinhi niini nga libro, nakalimot ko kung nasuksok ba gyud nako o wala. Oo, ania ra diay. Kon itugot sa Ginoo, Sabado sa gabii buot kong magwali sa hilisgotan nga *Nganong Maimpluwensyahan Man Sa Usa Ka Tawo Ang Kinabuhi Sa Usa Pa*. Ug Dominggo sa buntag gusto kong magwali bahin sa *Ang Pagtaklub Sa Piramide*. Ug sa Dominggo sa gabii usab gusto nakong iwali ang bahin sa *Akong Magtotultul*, ang hilisgotan nga, ang *Akong Magtotultul*, alang niining moabotay nga Dominggo sa gabii. Karon hinaut nga magapanalangin ang Ginoo nianang mga butanga ug tabangan ako, maingon nga atua ko kanunay sa gawas, ug bisan og hamubong konteksto lamang sa paghisgot niini.

²⁷ Karon niining gabhiona, gusto natong magdali ug maghisgot og pipila ka mga butang. Lain pa'y ako, naa diay ko'y sulat dinhi nga—nga bag-o lang gyud miabot sa koreyo, nga gikuha ni Billy kaganina lang, nga pipila sa mga kaigsoonan sa Michigan, ug kini gikan sa kapunongan sa mga ministro nga dunay daghan nga kung unsa na lang nga mga butang. Mao kana ang nakapagubot sa mga butang, kita n'yo. Nga, giingon nila dinhi

nga pipila kono ka mga kaigsoonan didto ang nag-ingon nga gipadala kono nako sila didto, ug nagawali sila nga kinahanglan na konong biyaan sa mga lalaki ang ilang mga asawa ug mangita og ilang espirituwal nga kapikas, ug giingon—giingon pud nga dili gyud kono ko masayup. Nga walay bisan unsa man... Ug, oh, uban pang mangil-ad kaayong mga butang nga inyong madungog. Ug hingsayran kini sa kapunongan sa mga ministro, ug sila nagpadala'g sulat kanako mahitungod niini, nga gipadala kono nako sila didto ug kini kono ang hinungdan sa maong dakung kagubot. Ug ang uban kanila nanagna ug nanag-ingon nga ang usa ka lalaki kinahanglan kono nga biyaan *kining* iyang asawa ug minyoan *kanang* usa. Karon, kini nga iglesia nahibalo gayud nga wala kita nagabarug alang sa bisan unsang binuang nga sama niana.

²⁸ Kita nagatoo sa Biblia. Kita nagatoo nga pagmopili ang usa ka lalaki og usa ka babaye, mao na kana iyang asawa, ug ang kamatayon lamang ang makapabulag kanila. Mao ra gyud kana. Wala kita nagatoo sa mga butang nga ingon niana. Wala usab kita nagatoo sa paghigugma nga wala na'y kaminyoon, man lang. Wala kita nagatoo nianang butanga. Kita hingpit nga nagatoo sa Biblia, ug Kana lamang. Busa maghimo lang ko'g kopya niini nga sulat, ug tubagon kini, ug imantala kini diha sa mga magasin, ug kana—kana na'y mosulbad niini. Nagalaum ko nga kini na, unta, makatubag kanila.

²⁹ Karon niining gabhiona, sa dili pa nato ablihan ang Kasulatan, makigsulti usà kita sa atong Ginoo.

³⁰ Among Langitnong Amahan, nagaduol kami sa Imong Trono sa kalooy, sa Ngalan ni Ginoong Jesus, Kanang Maong halangdon Nga mikunsad gikan sa Himaya aron ipadayag kanamo ang kadagaya sa mga bahandi sa Dios. Daw sa unsa Ka namong ginapasalamat an alang niining halangdong Jesus Kinsa mao ang kapadayagan sa Dios, nga personal nga gipadayag kanamo, ug pinaagi Kaniya kami adunay katubsanan gikan sa among mga sala. Ug kami karon nakalabang na gikan sa kamatayon ngadto sa Kinabuhi, tungod kami nagatoo Kaniya. Kay nahisulat mahitungod Kaniya, nga Siya miingon, “Siya nga nagapatalinghug sa Akong mga Pulong ug nagatoo Kaniya nga nagpadala Kanako, adunay Kinabuhing walay katapusan; ug dili na pagahukman sa silot, kondili miagi na gikan sa kamatayon ngadto sa Kinabuhi.”

³¹ Panalangini ang Imong mga Pulong, karong gabhiona, Ginoo. Ug ania kami aron moambit sa komunyong pagkataudtaod. Mga Cristohanon, mga isigkalungsuranon sa Gingharian nga magatigum palibot sa altar, ug dinha sila magaambit sa among ginatawag nga “ang komunyong,” ang—ang gamay nga bahin sa—sa sakramento nga Imong gibilin kanamo, aron ipakita nga kami nagatoo nga Ikaw namatay alang sa among mga sala, ug nabanhaw sa ikatulo ka adlaw,

ug buhi hangtud sa kahangturan, ug pagabuhaton namo kini hangtud nga Ikaw mobalik, sumala sa gisugo kanamo sa mga Kasulatan. Hinloi ang among mga kasingkasing gikan sa dautang mga hunahuna ug sa tanan nga among nabuhat nga supak sa Imong dakung kabubut-on. Amahan, pasayloa kami, ug hatagi kami sa Imong grasya karong gabhiona. Tipik-tipika nganhi kanamo karon ang Tinapay sa Kinabuhi, diha sa Pulong, samtang ginabasa namo Kini ug ginahisgotan Kini. Sa Ngalan ni Ginoong Jesus, ginapangamuyo namo kini. Amen.

³² Karon sa Basahon sa Pinadayag, sugod sa usa ka bersekulo lamang, buot kong basahon ang ika-20 nga bersekulo, o ang unang bersekulo sa ika-20 nga kapitulo.

Ug nakita ko ang usa ka manulonda nga nanaug gikan sa langit, nga may yawi sa kahiladman nga dili matugkad ug usa ka daku nga talikala sa iyang kamot.

³³ Karon, gusto nakong mamulong, kung mahimo, kung ulohan ba nako kini basi niining teksto o magkuha lang ko'g konteksto gikan niini nga teksto, sa sunod nga baynte o baynte-singko minutos, gusto nakong ulohan kini og, *Ang Yawi Sa Pultahan*. Karon, dili ko gusto nga—nga tawgon kini nga “mga yawi,” tungod kay gihatag na kang Pedro “ang mga yawi sa Ginghamarian.” Apan gusto nako kining ulohan og: *Ang Yawi Sa Pultahan*. Ug dayon pagkahuman niini, buot kong maghatag og hamubo nga pagsaysay bahin sa komunyon, sa dili pa kita moambit niini karong gabhiona.

³⁴ Karon, usa ka yawi. Namatikdan nako dinhi samtang nagbasa ta, nga kining Manulonda mikunsad gikan sa Langit, nga adunay yawi sa iyang kamot. Nagatoo ko nga naa kini sa Pinadayag 13 o 19, makita nato usab, ang laing Manulonda nga miabot nga adunay usa ka yawi. Ug ang yawi mao, ang katuyoan sa usa ka yawi, mao ang pag-abli sa usa ka butang, usa ka butang nga kinandaduhan, o usa ka butang nga kinahanglan kandaduhan. Apan ang yawi gihatag alang niana nga katuyoan.

³⁵ Karon, adunay daghang matang sa mga yawi, tungod kay daghan man kita'y paggamitan sa mga yawi. Adunay mga yawi alang sa mga balay tipiganan. Adunay yawi sa imong kaugalingong balay, naa'y yawi sa imong awto. Ug gitawag nato sila nga mga yawi, ug sila mga yawi. Ug puede sila himoan og kopya, bisan sa pila ka higayon. O ang sa balay, puede natong himoan usahay, og atong ginatawag, nga punoang yawi. Sa laing pagkasulti, usa kini ka yawi nga gihimo nga may mga pangligwat, nga kung idapat kini, kana—kana ang moliso sa kandado sa usa ka paagi ug halos maablihan ang bisan unsang pultahan, mao nga gitawag nga “ang punoang yawi.” Kini usa ka eskeleton nga hulma sa daghang mga yawi, ug mahimo niini ang pag-abli gamit ang ingon niana nga paagi, sa atong mga balay

o bisan sa atong mga awto, puede kining himoan og kopya. Ug unya adunay . . .

³⁶ Ang bisan unsang yawi dili makaabli og bisan unsang pultahan gawas nga gamitan kini og usa ka kamot. Kinahanglan nga aduna gyu'y butang nga mogamit sa maong yawi. Ang yawi mismo dili makahimo sa paggamit sa iyang kaugalingon. Nagkinahanglan nga aduna gyu'y mogamit niana nga yawi.

³⁷ Sama kini niining mikropono nga akong—nga akong gigamit sa pagpamulong. Kining mikropono dili makasulti. Gawas kung adunay mosulti pinaagi niini, dili kini makasulti sa iyang kaugalingon. Nagkinahanglan kini og usa ka butang nga mosulti pinaagi niini. Busa, dili kini ang mikropono mismo, kondili ang tingog o ang—ang tunog (sa likod niini) nga ginapalanog sa mikropono ngadto sa—sa kahanginan, paingon sa imong dalunggan.

³⁸ Karon, ingon niana pud sa pagsangyaw sa Maayong Balita. Dili kini kami sa among kaugalingon, ingon nga mga ministro, kay dili man kami ang Ebanghelyo. Kondili tigpadala lamang kami nga mao'y nagahatud sa Tingog sa Dios pinaagi sa among pagka-instrumento, nga mga kalalakin-an, ngadto sa tigpaminaw.

³⁹ Mao ra pud sa usa ka panan-awon. Sa pagkakaran wala ko'y mahimong isulti sa iglesia mahitungod sa usa ka panan-awon. Apan kung ang Balaang Espiritu mopadayag, unà, kanako og usa ka panan-awon, dayon akong ihatud ang maong panan-awon ngadto sa gitumong niini. Busa dili kini akoa, o kanako, ang panan-awon dili ako, o ako. Ang Dios ang mao'y naghatag sa panan-awon, ug ako usa lamang ka tigpadala, aron ihatud ang mensahe sa maong panan-awon ngadto sa mga tawo.

⁴⁰ Karon, mao ra pud ang yawi. Pasayloa ko. Ang yawi kinahanglan makuptan sa kamot nga moabli sa pultahan. Kita n'yo, kinahanglan gyud og kamot. Karon, ug sa yawi nga akong pagahisgotan karong gabhiona, usa ra ka kamot ang makakupot niini nga yawi, ug kana ang kamot sa pagtoo. Kini lamang ang makahimo sa—sa pagkupot niini nga yawi. Ug mga kamot gihapon ang nagakupot sa uban pang mga yawi, apan alang niini nagkinahanglan kini og kamot sa pagtoo.

⁴¹ Karon, ipananglitan nato ang yawi sa kahibalo. Karon, ang tawo kinahanglan, kung siya nagatinguha nga madugangan og kahibalo, kita n'yo, karon, adunay yawi niana. Adunay usa ka paagi nga kinahanglan maablihan sa maong tawo. Kinahanglan nga siya . . . magakuha sa iyang mga libro ug tulong-anan, ug siya dili . . . ug walay lain ang makapakat-on kaniya. Mahimo nila siyang tudloan, pero kinahanglan gyud siya ang makakat-on. Ug ang bugtong paagi nga mahimo kini, kinahanglan niya nga makuha kana nga yawi, nga adunay butang dinha nga

nagabukas o nag- . . . nagapadayag kaniya sa kahibalo nga iyang gipangita.

⁴² Ug adunay mga tawo nga gustong mosulay sa pagtugtog og piano, ug sila . . . o musika. Dili nila mahibaloan kung unsaon pagtugtog niini, pero puede sila moadto didto ug magbalik-balik sila'g patudlo sa usa ka magtutudlo, ug dili gihapon nila kini makat-onan. Dili gyud nila mahuptan kana nga yawi padulong nianang misteryo, kung unsaon pagpahiangay sa ritmo ug sa mga tunog sa pagkatono ug uban pa nga kaskas. Kinahanglan gayud ang yawi.

⁴³ Ug bisan sa matematika, aduna pu'y yawi sa matematika, nga kinahanglan lang maanad ka niini. Nakakita na ko'g mga kalalakin-an nga makakalkulo og upat ka laray sa mga numero, ug ilang gigamit ang ilang mga tudlo, ang matag usa sa ilang mga tudlo sa usa ka laray sa mga numero, ug paubos nga sama *niana* nga naglangkob tingali og lima o unom ka laray sa mga numero, ug ibutang ang maong tubag sa ubos. Upat ka laray ang ginakalkulo sa usa ra ka higayon, gikan sa numero uno hangtud sa siyam. Bueno, maglisud man gani ko'g kalkulo sa usa ka laray, gawas lang kon duna ko'y igo nga mga tudlo sa kamot ug tiil aron mag-ihap, aron—aron makalkulo kanang usa ka laray. Dili gyud nako makita ang yawi para niana. Pero, nakita n'yo, ang uban kanila aduna nianang yawi para niini, nahibalo sila kung unsaon pagsulbad niini.

⁴⁴ Ug adunay usa ka yawi sa kahibalo, para sa usa ka tawo nga buot makabaton og kahibalo. Aduna pu'y usa ka yawi sa siyensiya, sa mga siyentipikanhong pagtuki. Karon, adunay, usa kana ka hinungdanong yawi. Ginapangita kana nga yawi sa mga tawo.

⁴⁵ Sama dinhi dili pa lang dugay ilang nadiskubre ang atom, ug nahibaloan nila nga aduna gyu'y mga atom, ug dayon kini nga mga atom naglangkob sa mga molekula ug uban pa. Karon, nagbuhat sila og mga pagtuki, og adunay tawo nga nagtoo nga kung ang atom mao ang nagapugong sa tanang butang aron dili mabungkag, og kung mapatuyok kini nga atom, aron mahimong hinungdan nga mabungkag ang ginahuptan niini. Tungod kay, ang tanang butang ginahuptan sa atom aron matibuok, ug nasayod kita niana. Karon, kana nga haligi natibuok pinaagi og mga atom. Natibuok ka tungod sa mga atom. Ang sagbot, ang mga kahoy, ang tanan natibuok tungod sa mga atom. Busa, kung kana nga atom, nga nagatuyok sa usa ka direksyon, kung kini lahion ug ipatuyok kini pabali, nan mabungkag gyud kini. Ug, karon, nagatoo ang batangang mga siyentista nga puede kanang mahimo, ug ila kining gitrabaho nga gitrabaho, ug migugol sila og oras-oras, ug mga semana, mga tuig, hangtud nga nahimo silang hawud niini.

⁴⁶ Sa pagtoo ko, nga si Thomas Edison, kadtong nag-imbento,

sa suga, nga ingon nila nga ang maong tawo adunay kahibalo nga makahimo siya'g suga nga di-kuryente. Siya ang imbentor sa bombilya. Ug ayaw niyang maghigda sa higdaanan sa gabii. Dala-dala niya ang usa ka sandwich sa iyang kamot ug koanon kini, ug molingkod didto nga ginahunahuna kadto ug ginatrabaho. Sa kahaladman sa iyang hunahuna, adunay nagasulti kaniya nga mahimo niya kini. Unsa man kini? Kini'y usa ka yawi nga makahimo sa pag-abli sa dalan.

⁴⁷ Dili pa kaayo og daghang mga tuig ang milabay, adunay usa ka—usa ka tawo nga iyang gitooan nga siya adunay talento sa pagsulat og mga dibuhong kataw-anan. Nagtoo siya nga gikuptan niya ang maong yawi sa iyang kamot. Ug gusto niya. . . miadto siya. . . Nagpuyo siya sa Kansas. Miadto siya sa editor sa bantugan nga mantalaan didto sa Siyudad sa Kansas, ug gidala ang pipila sa iyang mga sinulat. Ug ang editor miingon, “Sir, wala gyud ka'y ingon-ana nga kahanas. Ikaw, ayaw na og sulayi pa, ikaw—wala ka'y kasarang nga mahimo kini.” Pero wala kana nakapaminghoy kaniya. Kay nasayod man siya nga aduna gyud siya niini. Ug nagsige siya'g balik-balik, naninguha, pero siya (ang editor) nagsige pud og balibad sa iya. Sa katapusan, miadto siya sa ubang mga dapit, ug gibalibaran gihapon siya nila, nga nag-ingon, “Mister, wala gyud ka'y ingon-ana nga kahanas. Wala ka'y kasarang nga mahimo kini.” Apan bisan pa niana nagtoo siya nga mahimo niya kini. Ug ingon niana ang paagi, nga siya aduna gyu'y usa ka butang sa iyang kamot! Sa kadugayan, nakakuha siya'g trabaho sa pagsulat og mubo nga eskrip para, sa pagtoo ko, sa editoryal o usa ka butang para sa usa ka simbahan, usa ka mubo nga dibuhong kataw-anan alang sa simbahan. Ug nag-abang siya og gamay'ng garahe nga daghan kaayong ilaga, diin ang mga ilaga nagdagandagan bisan asa, bisan sa iyang higdaanan, ug nakamatikod siya sa usa ka talagsaon nga gamay'ng ilaga. Didto natawo ang estorya ni Mickey Mouse. Karon usa na kini siyang si multimilyonaryong Walt Disney. Ngano man? Aduna siya'y gikuptan sa iyang kamot, ug nahibalo siya nga gikuptan niya kini, nahibalo siya nga mahimo niya kini. Ug ingon niana ang paagi nga makab-ot ang matag dagkung kalampusan. Kung ang mga kalalakin-an ug kababayan-an adunay usa ka butang sa ilang mga kamot, nga nahibaloan nila nga mahimo nila kini.

⁴⁸ Sa dihang gihampak sa polio ang nasud. Ingon nga, kitang tanan gimandoan nga magpabakuna, aron mapapas kini. Sa dihang mihampak ang polio. . . Kagahapon naminaw ko sa usa ka doktor samtang nagmaneho ko didto sa kadalanan, usa ka doktor gikan sa Louisville. Ingon niya, “Pipila ka tuig pa lang ang milabay, sa dihang miabot ang dakung hampak didto sa Louisville,” miingon, “kung didto lang ang ubang mga tawo kon diin ako nahimutang kaniadto, ug nasaksihan kadtong singkwenta'y-siete ka mga tawo nga dungan nakakonekta sa

mga respirator, ug ang mga kalalakin-an, mga kababayan-an, batang lalaki ug babaye, naparalisado tungod sa sakit nga gitawag og ‘polio,’ ug wala na sila’y sarang nga mahimo niini.” Ingon pa, “Dili na gyud ko gustong makakita pag-usab og ingon niana.”

⁴⁹ Pero gihunahuna sa siyensiya, “Kung adunay dautang butang sama sa polio, siguradong aduna pu’y usa ka butang nga pangsagang niini.” Nanlimbasog sila, nanagbarug sila sa kadalanan nga naka-botas, kadtong mga bombero, nangayo sila gamit ang ilang mga kalo, ug nagpakilooy sila, nanglimos sila, gibuhat ang tanan nilang mahimo, sa pagpaninguha nga makaplagan ang yawi nga makaabli sa pultahan sa kagawasan. Ug, sa kadugayan, usa ka Cristohanong maayong lalaki nga ginganla’g Salk ang nakakaplag niadtong bakuna. Ngano man? Adunay usa ka dautan nga mitungha, adunay usa ka mamumuno nga migimaw; aduna pu’y usa ka yawi sa kon asa man nga makapabukas og kagawasan alang sa katawhan, ug ang Salk nga bakuna mao ang labing epektibo nga panambal. Oh, kahibulongan gayud ang mahimo sa yawi! Gipagawas ang maong bakuna, ug karon ginapapas na sa niining bakuna kining polio, tungod sa “wala sila gikapoy ug wala misurender,” ang yawi anaa ra gyud sa kung asa nga dapit. Aduna gyu’y usa ka butang nga makapanalipod gikan niana, ug determinado sila sa pagpangita niini.

⁵⁰ Ug kung adunay dautang butang sama sa polio, diphtheria, buti, yellow fever, tetanus, panggahi sa apapangig, ug uban pa, mga dautang butang, nga nahimong pakiglimbasogan, sa siyensiya, adlaw ug gabii, hangtud nga ilang nakaplagan ang pangbakuna batok niini, tungod kay kini dautan, kini usa ka mamumuno, unsa pa kaha ka labaw nga adunay yawi ngadto sa kaluwasan para sa usa ka tawo nga natanggong sa bilangoan sa sala? Aduna gyu’y yawi niana nga pultahan, aron sa pagpalingkawas sa mga tawo gikan niini.

⁵¹ Ang yawi, kasagaran, sa dihang lisoan niini ang kandado, ug, kung makakita ka’g usa ka yawi, siguradong yawi kini sa kung unsa nga bahandi, butang nga bililhon, kay kondili dili unta nimo kini kinahanglan kandaduhan. Kung wala kini og igong bili para kandaduhan, pasagdi lang kini. Apan kung mahinungdanon kaayo kini nan kinahanglan gyud kining makandaduhan! Busa ang yawi kasagaran mao ang—ang timaan sa usa ka butang, o ang paagi nga makasulod ngadto sa usa ka butang nga bililhon. Ang yawi, mao kana ang katuyoan niini, karon, mahimo niini nga ablihan ang usa ka butang nga bililhon.

⁵² Karon atong mabasa diha sa San Juan, sa ika-10 nga kapitulo, si Jesus miingon, “Ako mao ang Pultahan ngadto sa toril sa mga karnero. Ako mao ang Pultahan,” dili *usa ka* pultahan, “*ang* Pultahan, ang bugtong Pultahan. Ako mao ang Dalan, ang bugtong Dalan, ang Kamatuoran, ug ang Kinabuhi,

ug walay bisan kinsa nga makaadto sa Amahan kondili pinaagi Kanako. Ako mao ang Pultahan ngadto sa toril sa mga karnero ug ang tanang moabot sa Akong atubangan mao'y mga kaaway, mga kawatan ug mga tulisan." Siya ang Pultahan ngadto sa toril sa mga karnero. Siya ang Pultahan ngadto sa kaluwasan.

⁵³ "Wala na'y laing ngalan nga gihatag sa ilalum sa Langit nga pinaagi niini ikaw maluwas, pinaagi lamang sa Ngalan ni Jesus Cristo." Walay iglesia, walay denominasyon, walay kredo, walay doktrina sa bisan unsa; pinaagi lamang sa Ngalan ni Jesus. Mao kana ang—mao kana ang Yawi. Dili ikahibulong nga si Pedro nakahimo sa paggamit sa usa niini niadtong Adlaw sa Pentecostes! Gustong mahibaloan sa mga tawo kung unsaon pagsulod niadtong maong Pultahan. Gigamit niya ang maong Yawi. Ug adunay usa lamang ka Yawi, tungod kay adunay usa lamang ka Pultahan. "Ako mao ang Pultahan." Ug si Pedro adunay Yawi Niini. Ug miingon siya, "Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong sala, ug madawat ninyo ang mga bahandi sa Dios." Kini ang Yawi sa Pultahan, ug si Jesus mao ang Pultahan.

Adunay usa lamang ka Pultahan sa pagpang-ayo, ug kana nga Pultahan mao si Jesus.

⁵⁴ Adunay usa lamang ka Pultahan sa kalinaw. Oo. "Thatag ko kaninyo ang Akong kalinaw." Siya lamang ang bugtong Pultahan sa tinuod nga kalinaw. Mahimong nagahunahuna mo nga aduna kamo'g kalinaw. Mahimo kang motigum og igong salapi aron makapalit og imong balay, mahimo kang motigum og igong salapi aron makapalit og mga sinina sa imong mga anak, adunay pagkaon nga makaon, ug mahimong nakaangkon ka og igong popularidad aron magustohan sa mga tawo. Apan sa dihang huboon na nimo ang imong sapatos inig kagabii ug andam na nga mohigda, adunay usa Lamang ka Butang nga makahatag kanimo og kalinaw. Kana mao, kung nahibaloan nimo nga mamatay ka na nianang gabhiona, adunay usa lamang ka Kalinaw, ug, kana mao'y, si Jesus nga mao ang Kalinaw. Siya ang atong Kalinaw.

⁵⁵ Siya ang atong Kaayohan. "Ako ang Ginoo nga imong Dios nga nagaayo sa tanan nimong mga sakit."

⁵⁶ Siya ang Pultahan ngadto sa Langit. Ug wala na'y lain pang pultahan o wala na'y laing dalan kondili pinaagi ni Jesus Cristo lamang. Siya ang Pultahan ngadto sa Langit.

⁵⁷ Ug karon si Jesus mao ang Pultahan sa tanang mga butang, ug ang pagtoo mao ang yawi nga nagaabli sa maong Pultahan. Karon, kung si Jesus mao ang Pultahan sa tanang mga saad sa Dios, ang pagtoo sa Iyang tapos na nga buhat mao ang magaabli sa matag pultahan sa matag bahandi nga anaa sulod sa Ginghamarian sa Dios. Nakita n'yo ba kini? Ang yawi mao. . .

Ang pagtoo mao ang yawi nga nagaabli sa tanang saad nga Iyang gisaad. Ingon niana ang ginabuhat sa yawi sa pagtoo, ang pagtoo sa Iyang tapos na nga buhat. Mao kini nga mga yawi ang atong ginahisgotan.

⁵⁸ Karon sa Mga Hebreohanon, sa ika-11 nga kapitulo, aduna ko'y usa ka hataas nga listahan kanila nga gisulat dinhi, mahitungod niining mga bayani sa pagtoo. Mao kadto ang yawi, sa—sa Pultahan, nga nagpatak-up sa baba sa mga leon. Mao kadto ang yawi, ang pagtoo, nga nag-abli kaniadto sa mga balay-bilangoan. Mao kadto ang pagtoo, ang yawi sa pagtoo, nga nagpalong sa gahum sa kalayo, nakalikay sa sulab sa espada, nagbanhaw sa mga patay. Pagtoo kadto, yawi sa pagtoo sa buhi nga Dios. Kanang kamot, kanang lalaki, kanang babaye, nga makakupot nianang yawi sa pagtoo, mahimo nilang ablihan ang tanang saad nga gihimo sa Dios. Apan kung wala nimo kana nga yawi, ug nagakulitog lamang ka, dili gyud nimo kini maablihan. Moungot ra hinoon kini, tungod kay kini nga yawi. . .

⁵⁹ Ang bisan unsang yawi nga husto ang pagkagama adunay pangligwat pag-anaa na sa sulod sa kandado, ug kini nagkinahanglan og usa ka piho nga porma, usa ka piho nga tabas niining mga yawi aron maliso kanang maong pangligwat. Ug usa lang ka gamay'ng sayup nga pagkaliso nianang pangligwat, madaut gyud ang maong tibuok butang.

⁶⁰ Busa, nagatoo ako sa tibuok nga Ebanghelyo, sa matag Pulong sa Dios, nga mao'y nagapagawas sa gahum sa Dios, nga mao'y nagapaliso sa Iyang mga panalangin paingon sa mga tawo. Mao kini ang yawi sa Pultahan, nga nagaabli Niini. Oh, kadtong bantugang mga bayani, mga propeta ug halangdong mga kalalakin-an sa Biblia, nga nakabaton niana nga yawi! Mao kana ang hinungdan nga ilang natak-up ang baba sa mga leon, gipalong ang mabangis nga kalayo, nakaikyas sa sulab sa espada, gibanhaw ang mga patay, ug gihimo ang tanang matang sa mga milagro, tungod kay gikuptan nila kana nga yawi ug nasayod gyud sila sa mahimong buhaton niini, tungod kay usa kini ka yawi nga naggikan mismo sa Kasulatan.

⁶¹ Karon, kung magakulitog lamang ako og usa ka yawi sa kredo, nan wala ako kahibalo kung unsay buhaton niini. Kung moingon sila “ang akong iglesia nagatudlo *niini*,” Wala ko'y kasayuran niana.

⁶² Apan kung ang Biblia ang nagatudlo niini, ug akong gikuptan ang yawi sa pagtoo sa akong kamot, o sa akong kasingkasing, nga nagaingon “Pulong kana sa Dios,” nan palongon niana ang gahum sa kalayo, ablihan niini ang kaayohan para sa mga may sakit, ablihan niini ang kaluwasan para sa mga nahisalaag. Kinahanglan kong moduol sa maong Pultahan, ang tanan pinaagi ra gyud sa Iyang Ngalan. “Bisan unsa ang inyong buhaton sa pulong o buhat, buhata kining

tanang sa Iyang Ngalan.” Mahibaloan ninyo nga ang yawi nga inyong nabatongan mao’y pagtoo, tungod kay kini usa ka yawi nga hinimo-sa-Kasulatan. Karon, kung usa kini ka yawi sa kredo, yawi pang-denominasyon, wala ko masayod kung unsay mahimo niini. Apan kung kini usa ka yawi sumala sa Kasulatan, makahimo kini sa pag-abli, tungod kay mao ma’y giingon sa Dios. Karon, oh, dili ikatingala nga mapalong nila ang gahum sa kalayo, ug uban pa, kay aduna man kanila ang yawi.

⁶³ Una ra nga pagtando sa Dios sa usa niadtong mga propeta, wala na’y makapugong kanila. Dili na Niya kinahanglan buhaton ang sama sa Iyang gibuhad kanako niadtong usa ka higayon, nga kinahanglan pang ibalikbalik, ug tingali kamo pud (naglaum ako nga dili), nga kinahanglan pang sigehan og sulti, “Lakaw og buhata kini,” ug dayon mapakyas ka, “Sige buhata *kini*,” ug “Balik ug buhata kini pag-usab, dili husto ang imong pagkabuhat niini.” Pero usa lang ka gamay’ng pagyango! Ingon-ana lang, mabati dayon nila ang Espiritu nga nagasulti kanila, “Kini ang angay mong buhaton,” ug wala na’y makapugong kanila. Igsoon, ilang-ilang gitak-up ang baba sa mga leon, nakaikyas sa sulab sa espada, gipalong nila ang kalayo, nabuhat nila kana tanan. Usa lamang ka gamay’ng pagtando gikan sa Dios, tungod kay anaa man ang yawi sa ilang mga kamot, kanang dakung pagtoo! Gibuhad nila ang mga butang alang sa Dios tungod kay walay makapugong kanila. Oh, pagkamahimayaon gayud!

⁶⁴ Sama sa batan-ong lalaki nga miduol usa ka higayon niadto sa usa ka tigulang nga igsoon nga usa ka diosnon nga tigulang nga lalaki, usa ka tigulang nga propeta sa Dios. Ug nadungog man gud niya kadtong tawhana nga kanunay nagapamatuod, kanunay nagasulti mahitungod sa kaayo sa Dios, ug kung unsa gayud ang Dios, ug kung unsa si Cristo, ug nagasige lang, sa pagpamulong. Sa katapusan, kining batan-on nga lalaki pagaordinahan na sa ministerio, mao nga miduol siya niining usa ka tigulang nga maalamon, ug ingon niya sa tigulang, “Sir, gusto kong mangutana nimo.”

Miingon ang tigulang, “Sige pangutana lang, batan-ong lalaki.”

⁶⁵ Ingon niya, “Tinuod ba nga ingon-ana gyud ka kamahinungdanon alang kanimo si Cristo sama sa imong ginaingon nga ingon niana gyud Kini?”

⁶⁶ Miingon ang tigulang, “Siya’y labaw ka kamahinungdanon alang nako kaysa kung unsa ang maabot sa akong ginahawa sa pagsulti!” Mao kana. Unsa man kana? Hingkaplagan niya ang yawi.

⁶⁷ Ang tubag sa batan-ong lalaki, niana, “Kung sinsero mong ginapahayag kining mga butanga, ug ginaingon mo kanako nga kini tinuod sama kung unsa ka katinuod, nan gusto kong

maila kanang mao rang Jesus, sa samang kamatuoran.” Unsa man kini? Hingsayran niya nga ang maong tigulang nga lalaki adunay gikuptan nga yawi, nga mahimo niya ang pag-abli ug pagkandadu.

⁶⁸ Kabalo na mo, ang usa ka yawi nga makasira, makaabli, pud. Kita n’yo? Mahimo n’yo ang pagtangtang o ang paggapos. Husto kana. Ang mao ra nga yawi nga nagasira, mao ra usab ang nagaabli. Ang yawi nga makahimo sa pag-abli, makahimo usab sa pagsira. Ug husto gyud kana, kita n’yo, tungod kay mahimo niini ang pagsira ug pag-abli. Makaluluoy gayud nga ang iglesia nawala kaniya ang hustong panan-aw mahitungod niana! Makapasubo gayud sa dihang gitugyan na sa iglesia ang iyang kaugalingon ngadto sa mga kredo, sama sa atong gibuhat karon, ug karon gapanawagan na og pakighiusa.

⁶⁹ Atong nakita kung hain sila ug ang bantugang Romanhong herarkiya magtigum karon, ug ilang pagausabon ang pipila ka mga programa. Abi nako nga dili na nila usabon; apan usabon gyud diay, nila, nga ihatag na kono sa matag pari ang gahum sa papa, ug—ug bisan asa pa siya, ug uban pa. Makaluluoy gayud, nga ang iglesia nahitugyan na sa mga dogma imbis nga sa Pulong. Kita n’yo? Dinha nila gibilin ang yawi, dinha mismo. Mao kana ang hinungdan nga ang dagkung mga milagro ug mga ilhanan wala na nagakahitabo taliwala sa maong mga tawo karon, nga nagakahitabo kaniadto, giwala nila ang yawi! Oo, nakatultol sila sa Pultahan, nahibalo sila nga atua ra ang Pultahan, apan ang sunod niini mao ang yawi aron maablihan ang Pultahan. Kay ang mga bahandi atua man luyo sa Pultahan. Gikandadohan kining mga bahandi, nga dili makita, sa dili-magtotoo. Apan ang magtotoo, nga adunay pagtoo ug may kasarang sa paggamit sa yawi sa pagtoo, maabli niya kini nga mga Pultahan. Oo, sir.

⁷⁰ Usa ka higayon dinhi pipila ka tuig ang milabay, adunay usa ka igsoon nga misyonaryo, ug gibati niya nga aduna siya’y pagtawag ngadto sa Africa. Siya’y usa ka batan-on pa nga lalaki; aduna na’y asawa ug duha ka anak, nga mga batang babaye, matahum kaayo, mga anaa sa pito o otso anyos, ang matag usa. Ug kining batan-ong lalaki dili gayud makalikay niini. Siya’y usa ka—usa ka ministro, aduna siya’y nindot nga simbahan didto sa kailayahan. Apan dili gyud siya makaikyas sa maong pagtawag, nga siya’y “kinahanglan gyud nga moadto sa Africa.” Ug nag-ampo siya, adlaw ug gabii. Dili unta siya gusto moadto. Ug gisegihan siya’g sulti sa Dios, “Kinahanglan gyud kang moadto!” Ug sa katapusan miabot na siya sa usa ka punto nga siya, kinahanglan nang magdesisyon, diin, siya—siya kinahanglan gyud moadto!

⁷¹ Busa miatubang siya sa hunta sa pagpangmisyon sa iyang iglesia, ug ang ingon niya, “Gitawag ako sa Dios sa natad sa pagpangmisyon didto sa kalasangan sa—sa Rhodesia.” Ug kini

nga kalasangan puno og malaria, og hilanat ug tungod sa kainit sa adlaw, nagdagsa ang mga sakit ug sanla, ug tanan na nga matang sa mga sakit didto nianang kalasangan, kon diin didto niyang . . . igahin ang nahibilin sa iyang kinabuhi. Gibaligya na niya ang iyang balay ug ang tanan niyang kabtangan. Busa gusto siyang sulayan sa hunta sa pagpangmisyon, ug ingon nila, “Sigurado na ba gyud ka niana?”

Miingon siya, “Sigurado ako.”

⁷² Ang ingon nila sa iya, “Sir, nahunahuna ba nimo kini gikan niining anggulo, nga aduna ka’y duha ka matahum nga gagmay pang mga batang babaye, ug aduna ka’y usa ka—usa ka matahum nga batan-on pa nga asawa, ug kung ikaw . . . Nganong dili nga ikaw lang usà ang moadto ug susihon kung unsay kahimtang didto ug pagkahuman mobalik lang nganhi?”

⁷³ Miingon siya, “Dili, misulti na ang Ginoo kanako. Oh, tinuod gyud kini!” Miingon siya, “Gitawag gyud ko sa Ginoo. Ug ako—dili ko unta gustong mobiya sa akong panimalay, dili ko gustong mobiya sa akong simbahan ug sa akong mga paryente, apan gitawag man gud ko sa Ginoo ngadto nianang kalasangan.”

⁷⁴ Ug miingon ang usa, “Sir, kabalo ba ka nga puedeng mataptan imong mga anak nga babaye og yellow fever o blackwater fever, ug mamatay, sa usa lang ka gabii?” Ug gihinganlan niya ang nagkalainlaing mga tawo nga namatay ang ilang mga anak, nga mga gagmay pa, tungod sa pagdala kanila didto, diin adunay mga sakit nga wala pa’y mga bakuna para niini. Ug miingon, “Hunahunaa na lang ang sanla, kung mataptan og sanla ang imong matahum nga asawa ug ang imong duha ka anak nga babaye, ug ang grabeng kainit sa adlaw didto ug ingon-anang mga butang nga kinahanglan nimong antuson.” Miingon pa, “Wala ka ba nahadlok, ug ang kapeligrohan sa pagdala sa imong mga anak ug asawa sa maong dapit?”

⁷⁵ Ug ang misyonaryo mitindog didto, ang batan-ong lalaki, ug ang mga luha misugod sa pagdagayday sa iyang mga aping, milingi siya, ug miingon, “Mga kaigsoonan ko! Ang akong panglantaw sa pagtawag sa Dios,” ingon pa niya, “kung gitawag ako sa Dios ngadto sa Africa, mas luwas ang akong mga anak ug pamilya didto sa Africa kaysa sa bisan asang lugar sa kalibutan.” Amen. Unsa man kadto? Aduna siya’y yawi sa pagtawag kaniya, aduna siya’y pagtoo bahin sa iyang ginasulti. Oh, sa akong hunahuna, pagkamaisugon nga pahayag! Sa una nakong pagkadungog niana, milukso akong kasingkasing. Kita n’yo, “Kung ang Dios nagtawag kanako sa Africa, ang akong mga anak nga atua sa mga sanla ug nagdagsang mga sakit ug uban pa, mas luwas sila didto kay sa ubang dapit ibabaw sa yuta.” Nabatonan niya ang yawi. Mao kana ang gikinahanglan.

⁷⁶ Kung nabatonan nimo ang yawi, wala ka’y kahadlok, wala ka’y pagduhaduha, wala ka’y pangutana. Dili na nimo

kinahanglan mangutana pa sa kang bisan kinsa bahin niini, kay eksakto kang nahibalo niini. Nakuptan na nimo kini sa imong mga kamot, nasayod na ka kung unsa ang imong pagabuhaton. Amen. Nahibalo ka kung unsa gayud ang kahimtang, nasayod ka nga maabli gyud ang pultahan. Gisusi na nimo ang mga pangligwat ug nasayod ka nga husto gyud kini, nga moabli gyud ang pultahan inig isulod nimo ang yawi niini.

⁷⁷ Oh, kung aduna lang unta ang iglesia og maong mga yawi! Kung ang iglesia aduna lamang nianang yawi sa pagtoo, maablihan nato ang bisan unsang pultahan, bisan unsang sakit, bisan unsang hampak, bisan unsang kahimtang. Puede kining maablihan alang kanato kung mabatonan lang nato kini nga yawi. Mao nga kining tawhana aduna gyu'y yawi sa iyang pagtawag.

⁷⁸ Kung inyo unta akong mapahanugotan og usa ka personal nga pagpamatuod. Akong nahinumduman mga kinse, dise-siete ka tuig na ang milabay, mahitungod, niadtong miingon ang Ginoo kanako didto sa suba, niadtong mikunsad Siya pinaagi sa Haligi nga Kalayo Kinsang hulagway inyo nang nakita, ug nakigsulti Siya kanako ug miingon Siya, “Imong pagadad-on kini nga Mensahe sa tibuok kalibutan.”

Ug nahinumdum pud ko niadtong sa Green's Mill sa dihang nakigsulti Siya kanako.

⁷⁹ Ug miadto ako ug gitug-an kadto sa pastor, ug siya miingon kanako, matud pa niya, “Billy, unsa diay imong gikaon niadtong gabhiona? Gidaman ka lang.” Ingon pa niya, “Balik sa imong trabaho. Nagtrabaho ka sa Public Service Company, aduna ka'y maayong trabaho, balik didto ug atimana ang imong—imong buluhaton, anak.” Miingon, “Gidaman ka lang. Aduna lang ka'y nakaon.” Apan wala kadto nakapaminghoy kanako bisan gamay!

⁸⁰ Sa dihang nagsugod na ako alang sa mga panerbisyo nga pagpang-ayo, daghan kaninyo dinhi ang makahinumdum pa sa akong Mensahe niadtong buntaga, nga nagwali ko mahitungod og, *Sa Dihang Miadto Si David Aron Tagbuon Si Goliath*.

⁸¹ Ug giingnan ko nila, matud niya, “Niining panahon sa modernong siyensiya, sa dihang aduna kita'y tanan na nga matang sa medikal nga mga pagtuki, sa dihang aduna na kita'y labing maayo nga mga doktor, sa dihang ang kaiglesiahian dugay nang nakalimot sa Balaanong pagpang-ayo ug ingon-anang butang sulod sa daghan nang, mga tuig nga milabay, unsaon nimo pag-atubang sa usa ka daku nga higante nga sama niana? Unsaon nimo pagpakig-atubang sa mga Methodist, mga Baptist, Presbyterian, ug uban pa, ug bisan sa mga Pentecostal, nga dugay na kining nahikalimtan, ug mipaingon na sa ilang mga kredo? Unsaon nimo pag-atubang, nga walay denominasyon o walay bisan unsa nga nagapaluyo kanimo? Unsa

ma'y imong buhaton, Bill?" Sa gihapon, sa makausa pa, wala kini nakapabalaka kanako bisan gamay, tungod kay adunay yawi nga gikuptan ko sa akong kamot! Miingon ko. . . Miingon sila, "Wala gyu'y motoo sa imo. Dili nimo kini mahimo. Walay motoo sa imo."

⁸² Miingon ko, "Dili ko igsapayan. Kay usa lamang ka butang ang sigurado; ang Dios nagtawag kanako, ug kinahanglan kong moadto tungod kay Dios ang nagtawag kanako." Gikuptan ko ang yawi. Gitawag Niya ako, gipakita Niya kanako, Iya kong gisultihan, ug akong nakita ang Iyang Presensiya niadtong gisugo Niya ako, ug atua mismo ang yawi!

⁸³ Ang pastor miingon, "Sa ikapito ra ang imong grado sa edukasyon, ug magawali ug magaampo ka atubangan sa mga hari ug mga monarka!"

Miingon ko, "Mao man kana ang ingon sa Iyang Pulong!"

⁸⁴ Niining panahona sa miaging tuig, o mas sayo pa og usa o duha ka semana, sa dihang mianhi ko sa simbahan ug gisultihan kamo nga ang Ginoong Dios naghatag kanako og usa ka panan-awon, nga moadto ko kono para sa usa ka pagpangayam, ug usa—usa kono ka mananap ang akong makit-an, nga adunay kuwarenta'y-dos-pulgada ang mga sungay niini. Ug sa dalan ko papauli gikan sa pagkuha niini nga mananap (diin kini maghupo, kung unsay posisyon niini), sa pagpauli ko, makapatay kono ko og usa ka silver-tip nga osong grizzly. Ug miadto ako niadtong dapita, ug nakig-istorya ko sa tawo, ug ingon niya, "Wala ko'y nahibaloan nga ingon niana nga mananap. Ug mahitungod pud sa usa ka osong grizzly wala pa gyud ko nakakita og ingon niana."

Miingon ko, "Apan sigurado kong anaa ra gyud kini dinhi."

⁸⁵ Busa miingon siya, "Dili man ta moadto sa lugar nga adunay mga oso. Moadto ta didto para manguha'g karnero, hangtud didto sa utlanan niadtong kakahoyan." Bueno, mikuyog gihapon ko kaniya.

⁸⁶ Ug sa ikaduhang adlaw nga didto mi, sa mismong dapit, diin ensaktong giingon sa Ginoong, atua gyud didto ang maong mananap. Busa niadtong gikuha na nako ang mananap, ug samtang among gipanitan ug gipanguha ang mga sungay ug uban pa, nga gipanitan, miingon kadtong tawo, "Naa ko'y ipangutana nimo. Gisultihan ko nimo, tulo na ka adlaw ang milabay niadtong mibiya ta sa—sa kampo, nga human nimo matiro kining usa ka mananap, nga sa pagpauli na ikaw 'makapatay og usa ka silver-tip nga osong grizzly.'"

Miingon ko, "Kana'y MAO KINI ANG GINAINGON SA GINOO!"

⁸⁷ Miingon, "Wala man ko nagduhaduha," matud pa niya, "tungod kay ang akong igsoong lalaki usa ka patolon kaniadto,

ug wala pa gyud nimo siya makita sukad, niadtong mitungas ka dinhi usa ka higayon, ug giingnan ko nimo nga ang maong bata mamaayo sa dihang aduna ko'y himoon nga usa ka butang. Ug siya naayo gyud.” Ingon niya, “Karon, pero, Igsoong Branham, gusto kong mangutana kanimo,” ingon niya, “Makita nako ang tibuk palugsong niana nga bukid hangtud didto sa kung asa ang utlanan sa kakahoyan, mga kabayo ra man ang atua didto. Ug walay bisan unsa didto. Walay bisan usa ka dahon sa balili, wala gani og bisan usa ka bato, wala gyu'y bisan unsa.” Mugbong lumot lang, nga mga duha ka pulgada lang ang katas-on, ibabaw pa didto sa utlanan sa kakahoyan, mga usa ka milya o sobra pa ibabaw niadtong utlanan sa kakahoyan. Miingon, “Asa kaha ang oso mogikan?”

⁸⁸ Miingon ko, “Ang Dios mao si Jehova-jireh. Kung giingnan ko Niya nga adunay usa ka oso didto, aduna gyu'y motungha didto.”

⁸⁹ Sa among paglugsong sa bukid, halos matag tunga sa milya o mga ingon-ana, sa kada paduol namo, ang ingon niya, “Igsoong Branham, halos oras na nga motungha kanang oso.”

miingon ko, “Ayaw kabalaka, motungha gyud kanang oso.”

⁹⁰ Ug niadtong hapit na mi nga halos lima ka gatus ka yarda na lang gikan sa nahimutangan sa mga kabayo, kinahanglan namong mopahulay pag-usab tungod sa bug-at nga mga sungay ug mga butang nga pas-an namo sa among likod. Ug milingi siya pag-usab, ug nakita nako ang iyang nawong samtang nagtan-aw siya kanako, nga sa sulod sa iyang kasingkasing daw sa dili siya mapahimutang. Kita n'yo, *naglaum* siya nga motungha unta kini, pero wala kaniya ang yawi.

⁹¹ Apan sa gihapon, sa grasya sa Dios, wala gyud ko Niya pakyasa. Niadtong gisultihan ko Niya nga adunay motungha og usa ka silver-tip didto, naa na kanako ang yawi. Wala gyud ko nagduhaduha niini, bisan gamay. Milingi ko niya, ug miingon ko, “Bud, motungha gyud kini.” Ug mao pa'y akong paglingi, mitungha na ang oso [Blangko nga bahin sa teyp—Ed.] nga nagtindog sa ibabaw ra namo, mga tunga sa milya.

⁹² Gilantaw niya sa gilayon gamit ang largabista, ingon niya, “Billy, husto gyud, usa gyud ka silver-tip!”

⁹³ Kita n'yo, ang yawi, ang panan-awon, ang Pulong sa Ginoo, walay bisan unsa ang makausab Niini o makapugong Niini. Ang gikinahanglan sa iglesia karong gabhiona dili usa ka edukasyon. Ang gikinahanglan sa iglesia karong gabhiona dili usa ka denominasyon. Ang gikinahanglan sa iglesia karong gabhiona mao ang yawi sa mga Kasulatan, ang Pultahan. Nga, si Cristo mao ang Pultahan, ug Siya mao ang Pulong. Ang pagtoo sa Pulong sa buhi nga Dios mao ang nagaabli sa matag pultahan.

Dios, ihatag kanamo ang yawi. Ihatag kanamo ang yawi.

⁹⁴ Mga Hebreohanon, sa ika-12 nga kapitulo, nagaingon, “Sa nakita nga kita usab gilibotan sa usa ka mabagang panganod sa mga saksi, isalikway nato ang tanan nga kabug-at, ug ang pagkawalay-pagtoo nga sa kadakung kasayon nagasipit kanato.” Naghisgot kini og “sala,” maingon nga, ang *sala* mao’y “pagkawalay-pagtoo.” Kita n’yo? Aduna lamang og usa ka sala, kana mao ang pagkawalay-pagtoo.

⁹⁵ Ug ang *sala* nagakahulogan og “pagsipyat sa puntinganan.” Sama sa kung aduna ka’y pusilon, nasipyat mo ang puntinganan, mas maayo nga imong ayohon usà ang imong pusil, kita n’yo, tungod nga aduna gyu’y sayup. Wala mo naigo ang puntinganan. Kita n’yo, balik ug sulayi pag-usab. Kita n’yo? Nagakahulogan nga balikan mo, maingon nga wala mo naigo ang puntinganan. Kung gusto nimo nga mahimong usa ka Cristohanon, ug nagpamiyembro ka sa iglesia, nasipyat ka sa pag-igo sa maong puntinganan. Kung gusto nimo nga mahimong Cristohanon ug nawisikwisikan ka sa ngalan sa “Amahan, Anak, Espiritu Santo,” nasipyat gyud ka sa pag-igo sa puntinganan. Kinahanglan nga balikan mo. Naligyas ka sa target. Mosimang gyud ka, sigurado gyud kana. Adunay usa lamang ka Butang nga makapabilin kanimo nga nakapunting gyud, kana mao ang Kasulatan, ang Biblia, ang Pulong. Kay, ang langit ug ang yuta parehong mangahanaw, apan ang Pulong sa Dios dili gayud mahanaw.

⁹⁶ Busa, kupti ang maong yawi, ang pagtoo sa Pulong! Ug ang matag tipik sa pagtoo mao nga nagatoo ka, ug ayaw gyud pagduhaduha bisan usa ka tipik, mahimo mong ablihan ang matag pultahan nga nagababag tali kanimo ug sa panalangin nga gitagana sa Dios alang kanimo. Hinaut nga tabangan kita sa Dios nga makabaton sa maong mga yawi, mao’y akong pag-ampo. Iduko nato ang atong mga ulo karon alang sa pag-ampo.

⁹⁷ Among Langitnong Amahan, nagapasalamat kami Kanimo karong gabhiona nga Imong gihatag kanamo ang yawi aron maablihan ang kaluwasan alang kanamo. Ako—ako nagapasalamat Kanimo tungod niana, Ginoo, nga kami naluwas, ug tungod sa yawi nga puede namong gamiton hangtud karon. Apan, Dios, hatagi kami ug pagtoo, nga ang matag usa niining mga Pulong nga gisulat diha sa Imong Basahon mao’y gagmay’ng mga pangligwat, ug kining Yawi nga gitawag og Jesus . . . kini nga Pultahan, nga ang pasabot ko, kining gitawag og Jesus; ug ang yawi, nga gitawag og pagtoo, magahikap sa matag Pulong, nga kini ang magaabli niini. Kini ang mopalihok nianang gamay’ng ligwat paubos ug kami makasulod na niana nga panalangin. Langitnong Amahan, ihatag kanamo ang mga yawi, aron nga mabatonan namo ang pagtoo sa mga saad sa Dios, aron nga dili mapakyas ang among pagtoo, aron kami mamahimong mga alagad Kanimo ug sa among mga kauban.

⁹⁸ Pasayloa ang matag sala sa among dili-pagtoo, Ginoo, ug

tabangi kami nga Mamaimo. Paduol kami karon sa lamesa sa komunyong, ug ako nagaampo, Langitnong Amahan, nga Imo kaming pasayloon sa tanan namong mga kalapasan, aron nga makasulod kami sa kalipay sa pagpakig-ambit palibot sa lamesa sa Dios. Amo kining ginapangamuyo sa Ngalan ni Jesus. Amen.

⁹⁹ Igsoon kong lalaki, igsoong babaye, kung aduna kanimo ang yawi sa Ginghamian, ang yawi sa Pultahan, ang yawi sa kaluwasan, tabangan unta kamo sa Dios sa pag-abli sa maong mga pultahan ug pasudlon si Jesus. Tugoti Siya nga ihatag kaninyo ang mga butang nga inyong—gitinguha.

¹⁰⁰ Karon, sa makadiyut sa dili pa kita magsugod sa pagbasa bahin sa komunyong, buot kong isulti ang usa ka butang tungod kay kini bahin sa komunyong. Ug sa atong pagduol niini nga altar, adunay usa lamang ka paagi sa pagduol, kana mao, kon atong gihuptan ang yawi sa pagtoo sa atong mga kamot, nga nagapahibalo kanato nga gipasaylo na ang atong mga sala. Ug kung wala kanato kanang yawi nga pang-abli niana nga Pultahan, nga nagpamatuod nga gipasaylo na ang atong mga sala, nan wala kita'y katungod sa lamesa sa Ginoo. Kay, ang mokaon ug moinum nga dili-takus, nagakaon ug nagainom sa hukom sa silot sa iyang kaugalingon, nga walay pagpakaila sa lawas sa Ginoo. Karon, tinuod kana.

¹⁰¹ Siguro kitang tanan nahibalo nga karong adlaw mao ang National Communion Day. Mao kini ang adlaw nga ang tanang mga kasibahanan nagapahigayon og komunyong. Kini ang National Communion Day sa tibuok nasud. Ug nahunahunaan ko nga angay lang nga magsulti ako og usa o duha ka pulong mahitungod sa komunyong sa dili pa nato kini pagadawatong, samtang ang pastor, kon buot niyang, andamon ang mga Kasulatan alang sa pagbasa sa—sa kahan-ayan sa lamesa sa Ginoo. Karon, kini nga komunyong. . . Karon, dili ko magdugay kondili mga napulo ka minuto lang.

¹⁰² Kining komunyong nga atong pagaambitan, dugay nang dakung panaglalis kaysa bisan unsang doktrina sa Biblia. Mao kadtong ilang. . . usa sa ilang unang mga panaglalis sa nahaunang iglesia. Ug karon ang Protestante, sama sa Episcopalian ug mga Methodist, ug daghan sa mga Protestanteng kaiglesiahan, malipayong nga modawat unta sa Katoliko, doktrinang Romano Katoliko, kung masulbad unta ang gamay'ng kalainan nila mahitungod sa komunyong. Apan mouyong man ang Katoliko nga ang pari kinahanglan nga minyo ug aron mamahimong mga ministro, ang simbahang Katoliko miuyong niana sa makadaghang higayon na diha sa ilang mga komperensya ug mga panagtigum. Miuyong sila niini. Ug mouyong sila sa lain-laing mga pag-ampo, ug uban pa, ang simbahang Protestante mouyong niana. Ug ang mga katekismo ug uban pa, ang gamay nga altar dinhi ug didto, ug ang simbahang Katoliko andam man sa pagbuhat niini. Apan kon bahin na sa komunyong,

dinha sila nagbingkil. Ang si bisan kinsa nga nakabasa sa kasaysayan nasayod niana. Apan, siyempre, sa akong tan-aw niini, daghan gyud sila'g kinahanglan biyaan, adisir ko—ko modawat niini, nakita n'yo, tungod kay wala kini sa Biblia.

¹⁰³ Apan adunay usa ka butang nga gusto kong isulti sa iglesiang Katoliko. Nahibalo ba mo nga ang iglesiang Katoliko, sa sinugdan, mao ang apostolikanhong pentecostal nga iglesia? Tinuod gayud! Mao kadto ang unang pagsugod sa maong iglesia. Ug nakita n'yo na kung asa na sila—asa na sila mipaingon, padayon silang nagataktak sa Pulong ug nagapasulod og dogma.

¹⁰⁴ Ug kung ang iglesiang Pentecostal molungtad pa og usa ka gatus ka tuig, mamahimong mas halayo pa kini sa Biblia kay sa iglesiang Katoliko sa karon, kung basihan sa dagan niini sa kasamtangan.

¹⁰⁵ Miabot og pipila ka gatus ka tuig, ang iglesiang Katoliko nga mapahalayo gikan Niini, tulo ka gatus ka tuig, gikan sa unang iglesia hangtud sa pag-organisa sa iglesiang Romano Katoliko, diin sila nagsugod. Ug nakaplagn sila, nga nagdala og mga tawong hataas ang katungdanan ug ingon-anang mga butang, ug gitangtang nila *kini* ug gipulihan *niini*, ug gikuha *kini* ug gipatindog *kana*, ug gipanangtang ang pagano nga mga diosdios ug gipatindog ang pang-Cristohanon nga mga rebulto, ug uban pa, ug nagpadayon sa pagpakigkompromiso Niana hangtud nga nakaabot sila sa kung unsa sila karon, ang iglesiang Romano Katoliko.

¹⁰⁶ Ug ang iglesiang Protestanteng Pentecostal sa milabay nga—nga singkwenta ka tuig gikan sa paglungtad niini, ug diin kini nagkaanam og kahulog sa kung asa kini nagsugod, mahimong mas grabe pa ang kahimtang niini kay sa iglesiang Katoliko, pag-abot og usa ka gatus ka tuig gikan karon. Husto kana. Mabug-at kana nga pagpanulti, apan tan-awa lang ang ilang pagkunhod gikan sa gikahulogan nila. Mipaingon na sila sa pagka-organisasyon, mipaingon sila sa pagpakig-kompromiso *niini* ug *niana*, ug tanan nang uban pa. Ug padulong na sila didto, kita n'yo, pabalik mismo.

¹⁰⁷ Apan, ang *komunyon*, kini gitawag og “ang panihapon sa Ginoo.” Karon, daghang mga tawo, gusto nilang ipahigayon kini sa buntag. Wala ma'y giingon sa Biblia nga kadto ang Iyang *pamahaw*. Ug kung unsa nga kining mga tawo sa karon, moingon gihapon nga “Panihapon sa Ginoo,” ug wala man gipahigayon ingon nga panihapon. Ilang gitangtang ang *panihapon*, ug giwala kini, ug gitawag kini og “paniudto,” binuang. Panihapon!

¹⁰⁸ Karon, kanunay kining gipanaglalis panahon pa sa Biblia, usa na kini ka panaglalis kaniadto pa. Wala mahisabti kaniadto sa mga tawo ang panihapon sa Ginoo. Inig adto nila sa lamesa, giingnan ni Pablo ang mga taga-Corinto, nanagduol sila ug nangahubog sa lamesa sa Ginoo. Kita n'yo, wala nila kini

mahisabti kaniadto pa. Matud ni Pablo, “Kung gusto n’yong mokaon, kumaon kamo didto sa inyong balay.”

¹⁰⁹ Ug usa pa ka butang, wala kini hisabti, kung unsa kini. Ang mga makasasala, ug ang tawo nga nagkinabuhi sa pagpakasala, moanha ug makig-ambit gihapon sa komunyong. Ug wala kadto mahisabti. Ang usa ka tawo nga nagpuyo-puyo uban sa iyang inahan, iyang ina-ina, ug gisultihan na siya sa simbahan mahitungod niana; apan nakig-ambit gihapon sa komunyong sa lamesa.

¹¹⁰ Ug dihay mga pagkabahinbahin taliwala kanila, ug sila nakig-ambit gihapon sa komunyong. Ingon ni Pablo, “Nakasabot ko nga nagkinabuhi kamo sama sa uban nga mga Gentil. Ug adunay—adunay panagbingkil taliwala kaninyo, sama sa—ilabina sa balay ni Cefas, ug uban pa.” Miingon, “Nagkinabuhi kamo sama sa tanang uban nga mga Gentil.” Kita n’yo, wala kini hisabti.

¹¹¹ Ang komunyong dugay nang wala nahisabtan. Karon, mahimo nakong ipadayon kana sulod sa daghang mga oras, apan kinahanglan pa natong ipahigayon kining komunyong ug ang paghinugasay og tiil. Karon hingpit na nilang giwala ang paghinugasay og tiil, gawas sa pipila lang ka mga denominasyon. Daghan sa mga Pentecostal ang bug-os nang nahilayo gikan niini. Kita n’yo? Ug anaa man unta gihapon kini sa Biblia sa paagi nga pagkasulat niini kaniadto. Kita n’yo?

¹¹² Karon, ang Roma wala na magtawag niini og “komunyong.” Gitawag na nila kini’g “misa, kini usa ka balaan nga misa.” Wala sila nagaambit og komunyong, kondili nagaambit sila og misa. Usa na kini ka misa, ug gitangtang na sa misa ang tinuod nga kahulogan gikan sa komunyong. Ang *misa* nagakahulogan og “nagalaum.” Nagatambong sila sa misa, nga nagalaum (nga pinaagi sa pagbuhat niini sa misa) pasayloon sila sa Dios sa ilang mga sala, pinaagi sa pagdawat sa “literal kono nga lawas ni Cristo, nga ang pari ang nagahimo sa Lawas ug Dugo ni Cristo nga mamahimong ingon niana,” nga sa pag-ambit niana, nagalaum sila nga pagawagtangon sa Dios ang ilang mga sala pinaagi sa pagpahigayon niini. Usa na kini ka misa.

¹¹³ Ginatawag kini sa mga Protestante og “komunyong.” Ang komunyong nagakahulogan og “pagpasalamat.” Nga ang Protestante. . . Ang Katoliko nagapahigayon og misa, nga diha sa misa nagalaum sila nga pasayloon sila sa Dios sa ilang mga dautang binuhatan. Ginapahigayon kini sa Protestante uban ang pagpasalamat tungod nga sila gipasaylo na pinaagi sa pagpakig-komunyong sa Dios; nagapakig-komunyong Kaniya, nga sila gipasaylo na. Ang Katoliko nagalaum pa nga pasayloon kini; apan ang Protestante nagaingon nga kini gipasaylo na. Ang Katoliko naghunahuna pa kung gipasaylo na ba kaha ang iyang mga sala; apan ang Protestante nagasugid nga sila

gipasaylo na, nga siya gawasnon na. Ug ang komunyong mao ang pagpakig-komunyong sa Dios. Magaambit kita niining mga elemento, dili nga *nagalaum* nga ang atong mga sala mapasaylo na, kondili ang mga *niini* gipasaylo na. Tungod kay kini . . . Ang usa’y paglaum; ug ang usa mao’y pagtoo. Ang usa nagalaum nga siya husto; ug ang usa nahibalo nga siya’y husto. Kita n’yo? Ang usa, ang usa nagalaum pa, tungod kay wala siya mahibalo kung asa siya nagbarug; ang usa nahibalo nga siya husto, tungod nahibalo siya kung unsa ang gisulti sa Dios. Mao kana. Mao kana ang kalainan. Busa, kung ikaw nagalaum lang, mag-amping ka; apan kung ikaw nasayod mismo, nan padayon ka lang. Kita n’yo, kung ingon-ana nagapakig-komunyong ka sa Dios. Ingon niana ang Protestante, nagaangkon nga siya gipasaylo na ug siya nasayod niini; ang Katoliko adunay misa, nga nagalaum nga siya pagapasayloon pa lang. Sama ra kini niini: ang usa ka makililimos, nagalaum nga okey ra unta ang tanan, kita n’yo; ang usa makililimos nga nagapasalamat sa kung unsa ang nahimo na. Parehas silang makililimos. Apan ang usa nagapakilimos, nga nagalaum nga mabatonan niya kini; ang laing makililimos nahibalo nga iya na kining nabatonan, ug nagapasalamat Kaniya sa paghatag niini kaniya. Karon, mao kana ang kalainan. Mao kana ang komunyong. Oo, sir. Ang usa nagalaum nga siya gipasaylo; ang usa nahibalo nga siya gipasaylo na, ug nagapasalamat alang niini.

¹¹⁴ Busa, ang komunyong alang lamang niadtong mga Cristohanon nga natawo na pag-usab sa Espiritu sa Dios. Ug ang *matawo pag-usab* wala nagkinahanglan nga ang pasabot niini nga nabatonan mo ang Espiritu Santo. Karon hinumdumi. Karon, daghan ang nanudlo niana. “Wala ko’y nailhan nga nanudlo niana nga sama niini,” sama sa giingon sa tigulang nga si Igsoong Arganbright niadtong gabhiona gikan sa pulpito dinhi, kita n’yo. Apan, ang bag-ong pagkahimugso dili ang bautismo sa Espiritu Santo. Ang Kasulatan wala nagasuporta niini, wala ako nagtoo niana, kita n’yo, sa akong pagtan-aw. Kita n’yo? Nagatoo ko nga nahimugso ka pag-usab . . .

¹¹⁵ Ug mao kana ang hinungdan nga ang pulong nga gigamit ko mao’y bautismo sa Ngalan ni Jesus Cristo, apan dili aron mabag-o ang kinabuhi. Karon, ang Pentecostal, iglesiang United Pentecostal, nagabautismo sa Ngalan ni Jesus Cristo para sa pagbag-o sa kinabuhi. Wala ko nagatoo niana. Ug puede nilang buhaton kana kung gusto nila. Pero nagatoo ko nga si Pedro miingon, “Maghinulsol,” una. Ang tubig dili makapasaylo sa mga sala. Ang Church of Christ nagawali og ingon niana. Pero nagatoo ko nga ang paghinulsol, ang diosnong pagbasol; ang *maghinulsol* nagakahulogan og “pagtalikod, pagbalik,” nasipyat ka sa puntingan, “magsugod pag-usab.” Buhata una kana! Ug ang imong bautismo sa tubig usa lamang ka panggawas nga pamahayag nga aduna na’y nahitabo sa sulod nimo, nga imo

nang gidawat si Cristo ingon nga imong Manluluwas.

116 Siguro mga taga-simbahan lang ang ania karong gabhiona, sa akong nahibaloan, wala man gud ko kanunay dinhi aron mahibaloan kung kinsa ang nagatambong o wala. Nakadawat ko og pagsaway dinhi dili pa lang dugay bahin sa pagbautismo sa usa ka lalaki dinhi sa bautismohan, usa ka tigulang nga lalaki. Ug mibisita ko kaniya, siya’y usa ka buotan og tigulang na nga lalaki. Nagkaaduna ko og pribilihiyo nga maagak ang tibuk niyang pamilya kang Cristo, ug silang tanan Cristohanon na. Kining tigulanga usa gayud ka buotan nga tawo, ug gusto ko siya, maong giadtoan nako siya ug miingon ko sa iya, “Tatay, nganong dili man ka gusto mahimong Cristohanon?” Ganahan siya nako.

117 Ingon niya, “Igsoong Branham, mahimong Cristohanon ako kung mahimo na kong maayong tawo.”

118 Miingon ko, “Sultihan ta ka kung unsay imong buhaton, Tay. Tan-awa ang palibot mo hangtud nga makakita ka’g dapit nga mahimo kang maayong tawo, dayon sultihi ko kung hain kanang dapita, kay gusto nako moadto, usab.” Miingon ko, “Si Cristo wala mianhi aron sa pagluwas sa mga maayong tawo. Mianhi siya aron luwason ang dautang tawo.” Kung gihunahuna nimo nga maayong tawo ka, nan wala Siya mianhi aron sa pagluwas kanimo. Mianhi Siya aron sa pagluwas kanila nga Iyang nasayran nga mga dautan. Kita n’yo? Namatay si Cristo aron sa pagluwas sa mga makasasala. Kita n’yo? Ug miingon ko, “Tatay, adunay linya mismo dinhi.”

Ingon niya, “Bueno, nagapanigarilyo man gud ko.”

Miingon ko, “Dili gani ko maghisgot niana.”

Ingon niya, “Gisulayan ko nang biyaan kini, Igsoong Branham.”

Miingon ko, “Sige, dili ta maghisgot bahin sa sigarilyo.”

Ingon niya, “Bueno, kung mahimo na nakong . . .”

119 Miingon ko, “Ayaw—ayaw na paghisgot og mahitungod niana, pasagdi lang kana. Gusto kong mangutana kanimo.”

Ingon niya, “Sige, unsa man kana?”

Miingon ko, “Nagatoo ka ba nga adunay Dios?”

120 Miingon, “Sigurado, nagatoo ko niini.” Miingon pa, “Nagatoo ko niana nga ingon ka lig-on sama kanimo, sa tan-aw ko, Igsoong Branham.”

121 Miingon ko, “Nagatoo ka ba nga ang mao ra nga Dios nag-usab sa Iyang matang ug nahimong unod ug mipuyo uban kanato diha sa persona ni Jesus Cristo, aron luwason ang tawo?”

Ingon niya, “Oo, nagatoo ko niana.”

“Ug Siya namatay aron sa pagluwas sa mga makasasala sama kanimo ug sama kanako?” Kita n’yo?

“Oo, nagatoo ko niana.”

¹²² Miingon ko, “Karon, kana’y sama ra niini. Kitang tanan ania sa usa ka daku nga bilding dinhi, ug anaa kita sulod sa prisohan, ug dili ko puedeng motindog niining suok ug moingon ‘*kini* ang makatabang kanako aron makagawas sa prisohan,’ motindog usab ko nianang suok ug moingon ‘*kana* ang motabang kanako nga makagawas sa prisohan,’ tungod kitang tanan anaa man sa pareho nga kahimtang. Ug ang matag tawo nga natawo niining kalibutana natawo sa kasal-anan, naporma diha sa kadautan, miabot sa kalibutan nga nagapamakak na. Usa siya ka masupilon, sa sugod pa lang.”

¹²³ Adunay nangutana niadtong miaging adlaw, ingon niya, “Igsoong Branham, kung. . . aduna ba’y kalainan tali ni Adan ug Eva, ug sa ilang mga anak karong panahona, kon silang tanan hubo, nga naglakawlakaw sa. . . Pareho—pareho ra kaha ang ilang lawas?”

¹²⁴ Miingon ko, “Dili, sir.” Papauli na mi niadto gikan sa pagpangayam og squirrel, si Igsoong Fred ug ako, ug usa ka grupo nila. Miingon ko, “Dili, dili sila mamahimong pareho.”

¹²⁵ Miingon, “Ang imo bang pasabot nga si Eva dili mahimong babaye sama sa iyang mga anak nga babaye, ug si Adan dili mahimong lalaki sama sa iyang mga anak nga lalaki?”

Miingon ko, “Sa daghang bahin, apan dili sa tanang pisikal nga bahin.”

Ingon niya, “Unsa kaha’y kalainan?”

¹²⁶ Miingon ko, “Wala sila’y pusod. Tungod kay gilalang man sila. Husto. Wala sila nakakonekta sa kung unsa man.”

¹²⁷ Hangtud nga kana nga timailhan anaa sa tanan nga natawo niining kalibutan, nagapakita nga usa siya ka masupilon, sa sugod pa lang. Husto kana. Miingon ko, “Sigurado, aduna gyu’y kalainan. Wala sila’y pusod. Wala sila nakakonekta sa kang kinsa man nga babaye, sa ilang pag-abot dinhi.” Kita n’yo, gilalang sila sa Dios.

¹²⁸ Karon, miingon ko, “Aduna ko’y buot isulti. Sa matag tawo sulod niining bilangoan, kinsa man ang balaan? Kinsa man ang wala matawo pinaagi sa pakighilawas? Kinsa ba ang puedeng motabang sa usa pa, bisan unsa pa siya? Kitang tanan ania niining mao rang bilangoan. Apan gihimo sa Dios ang Iyang Kaugalingon nga usa sa Iyang mga linalang ug mianhi nga dili pinaagi sa pakighilawas, apan pinaagi sa balaang Dugo nga Iya Mismong gilalang, ug pinaagi nianang Dugo Iya kitang gitubos.” Miingon ko, “Nagatoo ka ba niana, Tatay?”

Ingon niya, “Nagatoo ko niana.”

¹²⁹ Miingon ko, “Si Cristo namatay para sa dautang tawo sama kanimo. Karon, adunay usa lamang ka paagi. Ug wala ka’y kalambigitan niini. Ginatanyag Niya kini kanimo. Dili nimo kini

maangkon pinaagi'g merito. Wala ka'y bisan unsang mahimo aron makuha kini. Basta nga ginahatag lang Niya kini kanimo. Dawaton ba nimo ang Iyang gibuhat para nimo, aron mailayo ka gikan sa impiyerno?"

¹³⁰ Ingon niya, "Buhaton ko kana." Ingon niya, "Apan kung mahimo ko lang unta undangon kining pagpanigarilyo."

¹³¹ Miingon ko, "Ang mga sigarilyo na ang bahala sa kaugalingon niini. Imo lang... Wala ta ka ginaingnan nga undangon mo. Dili ako legalista. Nagatoo ako sa grasya. 'Ug ang tanan nga gikahatag Kanako sa Amahan magaari Kanako.'" Miingon ko, "Kung nagatoo ka niana sa tibuok mong kasingkasing!"

Ingon niya, "Sa tibuok kong kasingkasing, ginatooan ko kini."

¹³² "Kung ingon-ana dawaton ba nimo kini sa maong basihanang, nga dili ka takus niini, apan Siya lamang ang Mao'y takus? Ayaw tan-awa ang imong kaugalingon; tan-awa Siya, tungod kay wala ka na'y mahimo alang sa imong kaugalingon. Tan-awa ang Usa nga nagbuhat og usa ka butang alang kanimo. Unsa man Siya?"

"Oh," ingon niya, "Takus siya."

Miingon ko, "Mao gyud kana, nan dawata kanang Iyang ginatanyag kanimo."

Ingon niya, "Dawaton ko."

¹³³ Ug gibautismohan ko siya sa Ngalan ni Jesus Cristo. Ug migawas siya didto ug nagdagkot og sigarilyo.

¹³⁴ Pipila ka semana ang milabay miadto ko sa iyang pinuy-anan. Nakakita ko'g panan-awon usa ka gabii niadto, bahin sa usa ka evergreen nga kahoy nga giputol, nga gibaliskad. Nakakita pud ko'g mga tabla nga gilansang ngadto niini. Sa tupad mismo sa ulahing tabla diha'y usa ka talagsaong tabla. Sa ubos nianang tabla, diha mismo sa tumoy, nga nakatuyhad nga ingon *niini*, dinha mismo naputol ang kahoy. Ug usa ka Tingog ang miingon, "Ikaw unta kini," o, "Mamahimong ikaw unta kini." Ug natumba si Tatay Cox, ug nabunal ang iyang likod *diha niini*. Ug mao nga pagkasunod buntag ilang gidala ang iyang mga sigarilyo kaniya samtang naghigda siya didto sa higdaanan, nawala na kadtong iyang pagkahilig niini. Pipila ka semana lang ang milabay! Wala na gyud siya mitilaw bisan usa, ug wala na gyud siya'y hilig niini o bisan unsa pa. Kita n'yo? Ug nakita ko siya bag-ohay pa lang, nga nadagtum iyang tibuok kamot, pipila ka semana ang milabay, tungod sa pagpanigarilyo ug karon dili na gani niya mapahanugotan nga dunay manigarilyo sa tupad niya. Iplaster usà nato ang pinakaunang mga butang! Ayaw pugsa nga mahimong maayong tawo; kay dautan man ka, sa sugod pa lang, ug wala na ka'y mahimo niini. Adunay linya nga

nagapahimulag, ug ang tanang tawo anaa nianang pikas nga bahin.

¹³⁵ Karon, niadtong nahimugso ako niining kalibutana, kini tungod sa usa ka balaang kaminyoon, tali sa akong amahan ug inahan; sa tagoangkan sa akong inahan dihay usa ka itlog, ug sa mga glandula sa akong amahan adunay usa ka selula sa dugo. Ang akong kinabuhi gilangkuban niana nga selula sa dugo (dili sa itlog sa akong inahan), sa selula sa dugo sa akong amahan. Ug sa diha nga kanang selula sa dugo moadto sa hustong dapit niini aron sa pagsugat sa itlog, pagnahitabo kini, gimandoan sa Dios ang kinaiyahan sa paghatag kanako ug usa ka lawas. Ug dinha na ako mahimugso ngadto sa kaliwatan sa tawo, ako’y gihatagan na og kahigayonan nga—nga mamahimong intelihenteng indibiduwal sama sa kung unsa ang tawo, diin ako makamaneho na og awto, o ako makahimo na og mga butang nga sama sa ginabuhat sa mga tawo, maglakaw, magsulti, magmaneho og awto, ug uban pa. Gihatag kana kanako, tungod kay ako natawo na ngadto sa tawhanong pamilya, ug gihatagan og gahum sa salabutan aron mamahimong tawo.

¹³⁶ Karon, sa dihang natawo ako sa pamilya sa Dios, miabot ako pinaagi sa Dugo, ang Dugo ang naghatag kanako og Kinabuhi. Ug pagkahuman nga ako nahimong buhi diha kang Cristo, gibautismohan Niya ako sa Espiritu Santo ug gahum, aron mahimong anak sa Dios. Karon, sama nga ako makalakaw, makasulti nga sama sa usa ka tawo, makamaneho sa akong awto sama sa tawo, karon sa dihang ako nang nadawat ang Espiritu Santo, nadawat pud nako ang gahum sa paghingilin sa mga yawa, sa pagsulti sa bag-ong sinultihan, sa pagsangyaw sa Maayong Balita, sa pag-ayo sa mga masakiton. Gibautismohan ako! Dili gihimugso; kondili gibautismohan!

Nagtigum sila sa taas nga lawak,
Ang tanan nanag-ampo sa Iyang Ngalan,
Gibautismohan sila sa Espiritu Santo,
Ug miabot ang gahum sa pag-alagad.

¹³⁷ Amen. Nagatoo ka sa Kinabuhing Walay Katapusan, ug gipakatawo pag-usab tungod sa imong pagtoo. Si Jesus miingon, sa San Juan 5:24, “Ang nagapatalinghug sa Akong mga Pulong ug nagatoo Kaniya nga nagsugo Kanako, may kinabuhing walay katapusan,” dili Espiritu Santo, nagkaaduna lang og kinabuhing walay katapusan. Natawo siya pasulod sa pamilya sa Dios. Ug dayon gibautismohan ngadto sa Espiritu Santo, uban ang gahum sa salabutan sa pagtoo, aron toohan ang Ebanghelyo ug gamiton Kini sa pagpamuhat ug siguradohon nga husto ang pagpatuman Niini. Amen. Dayon nagalihok na siya ingon nga usa ka anak sa Dios. Dayon makahimo na siya sa paghingilin sa mga yawa. Si Jesus miingon, “Kining mga ilhanan maganunot kanila!” Kita n’yo? “Sa Akong Ngalan pagahinginlan nila ang mga yawa, magasulti og bag-ong mga sinultihan, makakupot og mga bitin,

makainom og mga butang nga makahilo.” Kita n’yo, nakadawat siya og gahum pinaagi sa Espiritu Santo, aron sa pagbuhat niining mga butanga.

¹³⁸ Karon, niadtong mibiya na Siya, Siya miingon, “Mas maayo alang Kanako nga mobiya Ako. Kay, kung dili Ako mobiya, ang Espiritu Santo dili moabot.” Kita n’yo? Dayon sa dihang Siya moabot, pagabadlungon niya ang kalibutan mahatungod sa sala, ug igatudlo ang pagkamatarung, ug magapahayag kaninyo sa mga butang nga umalabot (kana mao’y mga panan-awon). “Magapahinumdom Siya sa mga butang nga Akong gitudlo kaninyo, ug ipadayag kini kaninyo.” Ang mismong mga Pulong mao nga Siya’y mianhi. . . Walay tawo ang makasabot sa Pulong nga walay bautismo sa Espiritu Santo. Ug kung ang usa ka tawo nagaingon nga siya nakadawat sa bautismo sa Espiritu Santo, ug ginalalis ang pagkahusto sa Pulong, nan aduna gyu’y sayup.

¹³⁹ Si Pablo kaniadto usa ka kritiko sa Bag-ong Tugon. Apan, wala pa masulat ang Bag-ong Tugon niadtong panahona. Si Pablo usa ka kritiko sa Cristianismo, kaniadtong Saulo pa siya. Ug sa dihang nadawat niya ang Espiritu Santo, migugol siya og tulo ka tuig didto sa Asia ug gitun-an ang mga Kasulatan, tungod kay gikatudloan siya ilalum ni Gamaliel, nga usa ka bantugang magtutudlo. Sa iyang pagbalik, katorse ka tuig ang milabay, miadto siya sa Jerusalem aron makigkita kang Pedro, ug hingkaplagan niya nga ang ilang pagsabot sa Maayong Balita pareho gayud Pulong sa Pulong. Ang mao ra nga Dios nga nagpawali kang Pedro niadtong adlaw sa Pentecostes ug nag-awhag kanila nga maghinulsol ug magpabautismo sa Ngalan ni Jesus Cristo, ang mao rang Balaang Espiritu mao’y nagpadayag niini ngadto kang Pablo, ug gisultihan niya ang mga tawo diha sa Mga Buhat 19 human nga sila nabautismohan na sa bautismo ni Juan kaniadto, miingon, “Kinahanglan nga magpabautismo kamo pag-usab, sa Ngalan ni Jesus Cristo.” Kita n’yo?

¹⁴⁰ Kita n’yo, ang Balaang Espiritu nagpabilin gayud nga tul-id sa mga Kasulatan. Kini mao ang pagtoo Niana nga mao’y nagaabli sa matag tinago. Amen. Ang Biblia nag-ingon, sa Unang Juan 5:7, “Adunay tulo nga nagapamatuod, sa Langit: ang Amahan, ang Pulong (nga mao si Cristo), ug ang Balaang Espiritu. Kining tulo Usa ra.” “Ug adunay tulo nga nagapamatuod dinhi sa yuta: tubig, Dugo, Espiritu. Kining tulo dili usa ra, kondili nagakahiusa sila.” Karon, dili mo mahimong maangkon ang Amahan nga wala ang Anak, dili mo usab maangkon ang Anak nga wala ang Espiritu Santo; Tungod sila’y Usa ra. Apan mahimo kang mapamatarung nga dili gipabalaan, ug mahimo ra pud kang mabalaan nga walay Espiritu Santo. Ang pagpabalaan mao’y pinaagi sa Dugo, og pinaagi sa Dugo nagaabot ang Kinabuhi. Kita n’yo? Ug ang Espiritu Santo mao ang gahum sa Dios, kita n’yo, ang gahum nga gihatag ngadto sa iglesia.

¹⁴¹ “Kamo makadawat” (og unsa?) “og gahum,” Mga Buhat 1:8, “human nga ang Balaang Espiritu moabot nganha kaninyo. Kamo makadawat og gahum!” (Dili nga “matawo kamo pag-usab.”) “Kamo makadawat og gahum human nga ang Balaang Espiritu moabot kaninyo. Unya kamo mahimong mga saksi Ko sa Jerusalem, sa Judaea, ug sa Samaria, hangtud ngadto sa kinatumyan nga bahin sa yuta.” Kita n’yo? Makadawat ka og gahum human nimo madawat ang Espiritu Santo. Pero kinahanglan una nga madawat mo ang Espiritu Santo, ug kana mao ang gahum sa Dios, kita n’yo, aron maipadayag ug maipakita. Ikaw—ikaw . . . sama ra nga ikaw tawo, ug nakakat-on sa pagsulti ug paglakaw ug pagbuhat sa mga butang nga ginabuhat sa usa ka tawo; pag ikaw nabautismohan sa Espiritu Santo, gihatagan ka og gahum sa paglihok ingon nga mga anak nga lalaki ug mga anak nga babaye sa Dios. Dili ikatingala nga ang mga tawo nagapanggawi ug nagabuhat sama sa ilang mga ginabuhat karon, kay wala pa gyud sila gipuno sa Espiritu Santo. Kay kung gipuno unta sila, lahi unta ang ilang pagpanggawi. Nagaangkon sila nga nakabaton sila, apan si Jesus miingon, “Pinaagi sa ilang mga bunga maila ninyo sila.” Busa unsaon man ninyo paghibalo niini, kita n’yo, bug-os ka gayud magduhaduha. Kita n’yo? Pero balik lang sa mga butang nga tinuod!

¹⁴² Karon, kung ikaw nagkinabuhi og matarung ug nagaangkon sa imong kaugalingon nga usa ka Cristohanon, ginadapit ka namo karong gabhiona sa lamesa sa Ginoo. Karon, sa walay pagduhaduha, ang komunyong ginapahigayon sa tibuok nasud, nga ang uban niini ginabuhat sa usa ka paagi ug ang uban sa laing paagi usab. Pero sa hunahuna ko ang labing maayong paagi sa pagbuhat niini mao ang pagsunod sa Kasulatan, sa paagi nga ilang gibuhat kini sa Kasulatan. Sa hunahuna ko igo na kana.

¹⁴³ Aduna ka ba’y Biblia, Igsoong Neville? Magabasa na karon si Igsoong Neville sa Kasulatan.

[Nagaingon si Brother Neville, “Sa ika-11 nga kapitulo sa Unang Mga Taga-Corinto, sugod sa ika-23 nga bersekulo.”—Ed.]

[Kay gidawat ko gikan sa Ginoo ang gihatag ko usab kaninyo, Nga ang Ginoong Jesus sa mao rang gabii nga gitugyan siya mikuha og tinapay:]

[Ug sa nakapasalamat na siya, kini iyang gipikaspikas, ug miingon, Kumuha kamo, magkaon; kini mao ang akong lawas, nga gipikaspikas alang kaninyo: buhata ninyo kini sa paghandum kanako.]

[Sa maong paagi usab mikuha siya sa copa, sa human ang panihapon, nga nagaingon, Kining copa mao ang bag-o nga tugon sa akong dugo: buhata ninyo kini, sa matag inum ninyo niini, sa paghandum kanako.]

[*Kay sa matag kaon ninyo niining tinapay, ug matag inum niining copa, ginasangyaw ninyo ang kamatayon sa Ginoo hangtud sa iyang pag-anhi.*]

[*Busa bisan kinsa nga magakaon sa tinapay, ug magainum sa copa sa Ginoo, sa paagi nga dili takus, makasala batok sa lawas ug dugo sa Ginoo.*]

[*Apan ipasusi sa matag usa ka tawo ang iyang kaugalingon, ug unya pakan-a siya sa tinapay, ug paimna sa copa.*]

[*Kay bisan kinsa nga magakaon ug magainum niini dili-takus, nagakaon ug nagainum siya sa hukom sa silot alang sa iyang kaugalingon, nga walay pagpakaila sa lawas sa Ginoo.*]

[*Mao kana ang hinungdan ngano nga daghan kaninyo ang mga mahuyang ug mga masakiton, ug ang uban nangamatay.*]

[*Apan kon tinuod kita nga nakasusi sa atong kaugalingon, kita dili pagahukman.*]

[*Apan kung mahukman kita, pagasilotan kita sa Ginoo, aron kita dili mahinukman sa silot uban sa kalibutan.*]

[“Ang Ginoo magapanalangin sa pagbasa sa Iyang Pulong.”]

¹⁴⁴ Kanunay kining usa ka balaan nga butang, usa ka sagrado nga butang, siguro kinahanglan natong iduko ang atong mga ulo karon alang sa hilum nga pag-ampo. Iampo ko ninyo, iampo ko usab kamo. Magaampo kita alang sa usa’g usa, nga ang Dios magmaloloy-on kanatong dili-takus nga mga linalang nga magaabit niining dakung sakramento alang sa paghandum sa kamatayon sa atong Ginoo.

¹⁴⁵ [Mihunong si Igsoong Branham alang sa hilum nga pag-ampo. Blangko nga bahin sa teyp—Ed.] Kining pag-ampo sa pagsugid ginatugyan namo Kanimo, among Amahan, nganha sa Imong bulawanong halaran, uban sa among Halad, ang Ginoong Jesus. Ginapangamuyo namo kini sa Iyang Ngalan. Amen.

¹⁴⁶ Karon nagatoo ko nga ang mga anciano magaadto na sa ilang puwesto, ug sila . . . sa iglesia, ug magagiya sa mga tawo, samtang nagaduol sila, matag laray alang sa komunyong. Dumduma kanunay kana nga kanta:

Minahal nga naghimalatyong Cordero, ang
 Imong hamiling Dugo
 Dili gayud kini mawad-an og gahum,
 Hangtud ang tanang tinubos nga Iglesia sa
 Dios
 Maluwas, aron dili na magpakasala pag-usab.

Iduko nato ang atong mga ulo.

¹⁴⁷ Mapanalanginon ug Balaang Amahan, Jehovah, ang halangdong Makagagahum sa tanan, ipadala ang Imong mga panalangin sa Imong katawhan samtang kami nagapaabot. Pasayloa ang among mga sala. Ug karon among ihalad Kanimo kini nga sakramento, kini nga bino, nga hinimo gikan sa tinanum nga mga ubas, ug gipiga kini sa mga kamot sa mga ministro. Ug nahimo kini nga bino alang sa katuyoan nga among gidala kini Kanimo karon, aron kini magrepresentar kanamo sa Dugo sa among Ginoong Jesus Cristo. Ako nagaampo Kanimo, Amahan, sa pagbalaan sa bino alang niana nga katuyoan. Pasayloa ang matag sala namo. Ug hinaut nga ang matag tawo nga modawat niini nga bino sa ilang lawas, hinaut nga sila makabaton og kahimsog, kusog, ug kaluwasan nga nagagikan Kanimo. Itugot kini, Ginoo. Ginapangamuyo namo kini sa Ngalan ni Jesus. Amen.

¹⁴⁸ Ang Biblia nag-ingon nga sa dihang gipikaspikas Niya ang tinapay ug gipanalanginan kini, miingon, “Kumuha kamo ug kumaon kamo, kini mao ang Akong Lawas nga gipikaspikas alang kaninyo. Buhaton ninyo kini sa handumanan Nako.” Ug sa diha nga kita moambit niining gagmay nga mga bahin sa tinapay, nga kosher, nga gihimo nga walay lebadura, hinimo kini sa mga Cristohanon, ingon niana ang pagkahimo niini tungod kay kini—kini nagarepresentar sa Lawas ni Cristo. Atong nasabtan nga—nga mga tinun-an ni Cristo kadto niadtong panahona, o niadtong adlaw sa iglesia, ang mikuha niini nga mga tipik ug nag-andam sa panihapon sa katapusang panihapon, sa katapusang panihapon ni Cristo. Ug sa tibuok Biblia, ang mga tinun-an ang maong nagapang-apod-apod niining mga butanga sa mga katawhan. Ug karon, ang atong sa-karong-panahon nga mga tinun-an, ang atong mga kaigsoonan dinhi sa simbahan, ang mga disipulo niini nga Kawasa, mao ang magapang-apod-apod niini sa katawhan. Ug ilang dalhon kini nga mga tipik ug ipang-apod-apod sa mga tawo.

¹⁴⁹ Ug karon sa inyong pagdawat niini nga tinapay, hinumdumi, ginarepresentar niini ang Cordero. Daghang mga tuig na ang milabay kaniadtong ang nating carnero sa Israel ginasugba sa kalayo, ug ginakaon uban sa mapait nga mga utanon, ang mga katawhan adunay kusog; ang ilang mga sapatos wala gyud nangapudpod, ang ilang mga sinina wala gyud nagisi, sa tibuok nilang panaw hangtud nga nakaabot sila sa ilang yutang saad. Hinaut nga ang Dios ipapadayon kita nga himsog, malipayon, samtang nagapangalagad Kaniya hangtud nga makaabot kita sa Yutang Saad nga Iyang gihatag kanato.

Mag-ampo kita.

¹⁵⁰ Maloloy-on nga Langitnong Amahan, samtang ako namulong karong gabhiona mahitungod nianang Balaan, gibalaan nga Lawas sa among Ginoo, nga Diin nagpuyo ang bug-os kinatibuk-an sa pagka-Dios, sa diha nga mahunahuna

ko ang maong Lawas nga gikum-os ug—ug gilaksi, ug ang Dugo miagas, ang Iyang likod ug ang Iyang mga gusok makita na, tungod sa mga pagbunal sa taas ug ubos sa Iyang likod, sa dihang mahunahuna ko kining kunot-kunot, ug gipikaspikas nga tinapay nga ginarepresentar kana, nagaabot kini nga labas sa among mga kasingkasing, among ginahalad ang among mga kasingkasing, Ginoo, sa Imong halaran niining gabhiona. Pasayloa kami, Oh Dios. Ug hinaut nga kining gipikaspikas nga tinapay, sa dihang kini nagasulod sa baba niining, Imong mga alagad, hinaut nga ilang maila nga Imo kining bilihong Lawas nga nabun-og kaniadto ug gisamaran, ug pinaagi sa maong mga labod nangaayo na kami. Itugot kini, Ginoo. Balaana kining kosher nga tinapay para sa katuyoan gayud niini. Nagapangamuyo kami sa Ngalan ni Jesus. Amen.

Hulat lang sa kadiyut.

¹⁵¹ Kini dili usa ka komunyong nga para sa amo lang. Ang tanang Cristohanong magtotoo ginadapit nganhi sa lamesa sa Ginoo, aron makabaton usab sa pakig-ambitay uban kanamo...?...



62-1007 Ang Yawi Sa Pultahan
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org